

कोरिन्थला वोतुप तेपा कितुपतिवाला पावलकी टिवु यिकी थल्मा

दी थेपकी कोर्ला

दी ति पावलकी कोरिन्थीतिवाला टिवु यिकी थल्मा यिन। पावलकी कोरिन्थीला चर्च च्यिक गो चुनोक। ख्रीष्टला तेपा क्यावु तप्की ती चर्चकी ख्रीष्टियानतिवी मिजीला माङ्शोक कलेतिवा ख्येलनोक। ती कलेतिवा दोकुपला पावलकी दी यिकी ति टिवु यिन। ती पेला कोरिन्थी ति तेरी लुङ्बाकी मुला तम्जी वोतुप ग्रीककी छासे ग्येसा ग्येर्पु यिनोक। ती ति अखैया सिरुप रोमी लुङ्बाकी ग्येल्सा नोक। ती ग्येसाकी छासे मिङ् फेलुप छोड ताङ् मिङ् फेलुप रिक्शुङ् ति कनिवा साङ् डोशी मारेला गाल्नोक। ती ग्येसा ति किताङ् नालु मेलोवा गलुप ताङ् फयान नम्बा बडी वोतुप ग्येसा यिन सिनी डो शेकिनोक।

पावलकी तेरी सिनाङ् पप ग्येर्पु क्यावु ति ती ताम्डेतिवाला दोकुप यिन। तिवा ति चर्चला ख्ये पेतुप, किताङ् नालु मेलोवा, पुम्पेजा ख्योकपेजाकी तम्जी, जेन्दीकी कोर्ला टिवातिवा, सेमगी ताम्डे, चर्चकी ठिम, कोन्छ्योककी थु चाङ्माकी कटिन ताङ् शिनी सेन्बु लङ्गुप ताम्डेतिवा यिन। पावलकी ती ताम्डेतिवा खोरुङ्ला वोतुप छासे रिक्पा ताङ् डार नेसुर दी यिकीला हाक्को ज्यितुपला टिनी वे।

लोप्च्येन च्युकसुमला ड्यिङ्ज्ये ति कोन्छ्योककी खोरे गिपातिवाला नङ्गुप बुल्वा नाङ्ला तेरी सिनाङ् ल्यामु यिन सिनी टि वे। दी यिकीला तेरी सिनाङ् खक्छ्येवु ताम्डे ति दी राङ् यिन।

मुला राड वोटुप लोप्येनतिवा

- थेपकी कोर्ला १:१-६
- चर्चला ख्ये पेतुप १:१०-४:२१
- पुम्पेजा ख्योकपेजी मिछाडकी मिजी ५:१-७:४०
- ख्रीष्टियानतिवा ताड ल्हलु तेन्दुपतिवा ८:१-११:१
- चर्चकी मीतिवी मिजी ताड सोवा देकुप ११:२-१४:४०
- ख्रीष्ट ताड तेपा कितुपतिवा सेन्बु लङ्गुप १५:१-५८
- यहूदियाकी ख्रीष्टियानतिवी थोकला १६:१-४
- रडगी ताम्डेतिवा ज्याक्नी सिन्दा क्यावु १६:५-२४

१ टसी देलेक! दी यिकी ति कोन्छ्योककी नोवा नेमा ख्रीष्ट येशूकी लोमा छ्ये च्युङ्गुपला खोकी कताड नङ्गुप ड पावल ताड दाक्पी नुप सोस्थेनेसकी छ्योक नेसुर २कोरिन्थला वोतुप कोन्छ्योककी चर्च ताड येशू ख्रीष्ट नेसुर टेङ्बु च्युङ्गुप मीतिवा ताड चाङ्मा वोतुप गिपा च्युङ्गुपला कोन्छ्योककी पेन नङ्गुपतिवा ताड तेरी दासाला येशू ख्रीष्टला दाक्पी चोवो सिनी खोकी मिडला कतङ्गुप मीतिवा तेरीला टिवु यिनो। ३ख्यिराड तेरीला दाक्पी पपा कोन्छ्योक ताड चोवो येशू ख्रीष्ट नेमा कटिन ताड लोदिमु वुड्शी।

थुचिछे बुलुप

४ड ख्यिरा थोक्ला कोन्छ्योकला नरी थुचिछे बुलिन, च्यिलासिसिन येशू ख्रीष्ट नेसुर खोकी ख्यिराडला कटिन नड वे। ५खो नेसुर कोन्छ्योककी ख्यिराडला मीतिवा तेरीला ताम्डे लपुप ताड तेरी हाक्कोवु रिक्पा बडी नङ्नी वे। ६तमा ड्यिरा ख्यिराडला येशू ख्रीष्टकी कोर्ला बिन्दुप पड्बु ति ख्यिरा मिजीला रम्बु च्युङ्नी वे। ७तुक क्यानी ख्यिराड दाक्पी चोवो येशू ख्रीष्ट लोकनी फेवु तुजेला गुनी देतुप तप्की कोन्छ्योककी ख्यिराडला खोकी थु चाङ्माकी नङ्गुप ड्येम्बा साड बडी नङ्गिगी। ८तमा दाक्पी चोवो येशू ख्रीष्ट फेपुप तुजे सेक ख्यिराड काड साड क्यान मेतुप जोपला

खोकी ख्यिराडला रम्बु जो नङ्गिगी। ९कोन्छ्योक ति खोङ्तेर्मु वे। खोकी खोरे सेवु दाक्पी चोवो येशू ख्रीष्टकी मुला डिकजोम कितुपला ख्यिराडला कताड नड वे।

चर्चकी मीतिवा ख्ये पेतुप

१०अच्युनुपतिवा, चोवो येशू ख्रीष्टकी मिडला ड ख्यिराडला ठाकुरे सिरिन। ख्यिराड च्यिक ताड च्यिककी मुला थिन्नी दे। ख्यिरा पर्ला ख्ये पेतुप लाका माकी, यिने सेम च्यिक राड च्युङ्नी दे। ११च्यिलासिसिन ख्यिरा पर्ला खाँदा शोर्नोक सिरुप लेन ति क्लोएकी मिछाडकी मीतिवी डला बिन्सुड। १२ती लेन ति काड यिन सिसिन, ख्यिरा पर्ला ललाइकी “ड पावलकी ति यिन।”, ललाइकी “ड अपोल्लोसकी ति यिन।”, तमा ललाइकी “ड केफासकी ति यिन।”, तमा ललाइकी “ड ख्रीष्टकी ति यिन।” सिनी सिनोक लो। १३काड च्यिक राड वोतुप येशू ख्रीष्ट साड कुतुक कुतुक वे रो? काड ख्यिरा थोक्ला पावल ग्यङ्गिङ्गुपला टुङ्गुप यिन रो? काड ख्यिरा पावलकी मिडला बप्तिस्मा लावु यिन रो? १४ड कोन्छ्योकला थुचिछे बुलिन। डे याड क्रिस्पस ताड गायसला मिसिन यम्बा सुला साड बप्तिस्मा माबिन वे। १५तुक क्यानी ख्यिराड सी साड ड पावलकी मिडला बप्तिस्मा लावु यिन सिनी सि मुथुपी। १६ए डोतोक,

स्तिफनासकी मिछाडकी मीतिवाला ति बप्तिस्मा बिन्दुप यिन। ती ज्युक्ला यम्बा सुला साड बप्तिस्मा बिन्दुप ति डला टासा मे। ^{१७}च्यिलासिसिन ख्रीष्टकी डला मीतिवाला बप्तिस्मा तेरुपला मिन, लेन ल्यामु ख्याप्टाक कितुपला तङ्गुप यिन। ती लेन ल्यामु ख्याप्टाक क्यावु ति जम्बुलिङकी रिक्पाकी ताम्डे नेमा मिन। दोजो डे जम्बुलिङकी रिक्पा नेमा ख्याप्टाक क्यावु यिन्सिन ख्रीष्ट ग्यङ्गिङला टुङ्गुप ति तेमें जोवु यिन।

कोन्छ्योककी डार ताड रिक्पा वोतुप ख्रीष्ट

^{१८}ख्रीष्ट दाक्पी दिक्पी थोक्ला ग्यङ्गिङला कल्नी टुङ्गुप कोर्ला लेन ल्यामु ख्याप्टाक कितुप पेला तेपा माक्यानी ना डोपतिवी “ती ति तेमें यिन।” सिनी सिवी, यिने दाक्पु दिक्पा ने थरुपतिवी याड “ती ति कोन्छ्योककी नङ्गुप डार यिन।” सिनी सिवी। ^{१९}कोन्छ्योककी सुडला दुक सिनी टि वे,

“ड खामु वोतुपतिवी रिक्पा ति ना तोङ्गियन।

तमा च्यङ्बु वोतुपतिवी च्यङ्बु साड ना तोङ्गियन।”*

^{२०}ती तप्की रिक्पा वोतुपतिवी रिक्पा ति काड फेन थोसुड रो? छ्योकी गेकेनतिवी येन्देन ति काड

फेन थोसुड रो? तमा ताम्डे लपुपला खामु वोतुपतिवी ताम्डे ति काड फेन थोसुड रो? कोन्छ्योककी दी जम्बुलिङकी रिक्पा वोतुपतिवी रिक्पा ति काड साड फेन मोथोवु जो नाङ्गुसुड। ^{२१}जम्बुलिङकी मीतिवी खोरो रिक्पाकी कोन्छ्योकला डो माशेवु तप्की दाक्पुला खोकी रिक्पा नाङ्गुसुड। खोकी रिक्पा नेसुर दाक्पी ख्याप्टाक क्यावु सुड ति तेमें यिन सिरुपतिवी पर्ला सी ती सुडला तेपा किवे, तिवाला कोन्छ्योककी ज्होकुप नो क्यासुड। ^{२२}यहूदीतिवा ति कोन्छ्योक नेमा वुङ्गुप हलेवु त छोल्लिगी, तमा ग्रीकतिवा ति कोन्छ्योककी थोक्ला हाक्कोवु रिक्पा छोल्लिगी। ^{२३}यिन्सिनाड डियराड ति ग्यङ्गिङला कल्नी टुङ्गुप येशू ख्रीष्टकी कोर्ला सुड ख्याप्टाक किवी। ती सुड ड्येन्दुप पेला यहूदीतिवी दी ताम्डे ति कोन्छ्योकला मारे तोङ्गुप यिन सिनी सिवी, ग्रीकतिवी दी ताम्डे ति फेन मोथोवु यिन सिनी सिवी। ^{२४}यिने कोन्छ्योककी कताड नङ्गुपतिवी थोक्ला यहूदी यिन्शी ग्रीक यिन्शी, ख्रीष्ट ति कोन्छ्योककी डार ताड रिक्पा यिन सिनी हाक्कोकिवी। ^{२५}च्यिलासिसिन दाक्पी थोङ्गुदाडला कोन्छ्योककी अम्बारङ्गिङ क्यावु दोके थोङ्गिसनाड, ती ति मीतिवी रिक्पा सिनाड छासे छ्ये वे। कोन्छ्योक ति

काड कि मुथुपु दोके थोडिसनाड मीतिवी डार सिनाड छासे छ्ये वे।

२६ अच्यनुपतिवा, कोन्छ्योककी ख्यिराडला पेन नङ्गुप पेला ख्यिराड चुकै वे? नासाम तोड। जम्बुलिङकी मीतिवी थोड्दाडला ख्यिरा पर्ला रिक्पा वोतुप ताड ओड छ्ये वोतुप ताड गी ल्यामु वोतुप अला मे। २७ यिने कोन्छ्योककी दी जम्बुलिङकी रिक्पा वोतुप मीतिवाला डोछाला ख्येल ज्यितुपला जम्बुलिङकी अम्बारडिशड वोतुप मीतिवाला पेन नाड्सुड। तमा ओड छ्ये वोतुप मीतिवाला डोछाला ख्येल ज्यितुपला जम्बुलिङकी ओड मेतुप मीतिवाला पेन नाड्सुड। २८ तोजो तिराड मिन, मीतिवी छ्ये यिन सिनी सिक्पावु मीतिवाला तेन्दोक मेतुप जो नङ्गुपला कोन्छ्योककी दी जम्बुलिङला तेरीकी ड्यिङ्मर क्यावु ताड तेरीकी मर्च्या क्यावु मीतिवाला पेन नाड्सुड। २९ खोकी तुक क्या नङ्गुप ति दाक्पु सु साड ड राड छ्ये यिन सिरुप नो मिक्शी सिनी यिन। ३० यिने कोन्छ्योककी ख्यिराडला येशू ख्रीष्ट ताड मुला जु च्यिक राड जो नङ्गुप यिन। खोकी ख्रीष्ट नेमा दाक्पुला खोकी रिक्पा नाड्सुड। तमा खोकी थोड्दाडला दाक्पुला चाड्मा ताड टेड्बु वोतुप जोनी दिक्पा ने थर च्यिसुड। ३१ ती तप्की कोन्छ्योककी सुडला साड “दोजो तेके कितुप

यिन्सिन चोवो कोन्छ्योककी थोक्ला राड तेके किशी।” सिनी टि वे।*

येशूकी ग्यडिशडला टुङ्गुप तिराड ख्याप्टाक कितुप

२ अच्यनुपतिवा, ड ख्यिरा ते वानी कोन्छ्योककी थोक्ला पड्बु तेरुप पेला ताम्डे ग्येर्पु ग्येर्पु क्यानी छासे रिक्पा वोतुप मीतिवी दोके ख्याप्टाक माक्या। २ च्यिलासिसिन ती पेला डे येशू ख्रीष्टकी कोर्ला ताड खो ग्यडिशडला कल्नी टुङ्गुप कोर्ला तिराड मिसिन ताम्डे यम्बा काड साड कितुप नो माक्या। ३ ड ख्यिरा मुला वोतुप पेला काड साड कि मुथुवु दोके ताड छासे ज्यिवा लानी ज्हुकिन वायिन। ४ डे ख्याप्टाक क्यावु सुड ताड टोङ्गु बिन्दुप ति जम्बुलिङकी च्यु ताड रिक्पा नेसुर मिन, यिने कोन्छ्योककी थु चाड्माकी ओड ताड डार नेमा क्यावु यिन। ५ तुक क्यानी ख्यिरा येशूला तेपा क्यावु ति मी येन्देन ताड रिक्पाला मिन, यिने कोन्छ्योककी ओड्ज्येनला ज्योकुपला यिन।

कोन्छ्योककी थु चाड्मा नेमा वुङ्गुप रिक्पा

६ यिन्सिनाड कोन्छ्योकला तेपा रम्बु वोतुपतिवाला ताम्डे कितुप पेला ड्यिराड दी रिक्पाकी कोर्ला

राड ख्याप्टाक किवी। दी रिक्पा ति दी जम्बुलिङकी रिक्पा ति मिन, जम्बुलिङकी ओङ्ज्येन कितुप मीतिवी रिक्पा साड मिन। तिवी रिक्पा याड वुतुड के तोर्नी डिवी। ७यिने डियराड ति गोमाला छ्याकला वोतुप ताड तन्दा ति तेरी हाक्कोवु कोन्छ्योककी रिक्पाकी कोर्ला ख्याप्टाक किवी। ती रिक्पा ति जम्बुलिङ ज्येङ्गुप सिनाड गोमा नेज्युनी दाक्पी मोवाकी थोकला टडिक क्या नङ्गुप यिन। ८ती ताम्डे ति दी कल्वाकी ओङ्ज्येन कितुपतिवी हाक्पाको। तिवी हाक्कोवु यिन्सिन मोवा वोतुप चोवो येशू ख्रीष्टला ग्यडिंशडला मेगेलुप्जा। ९ती तप्की कोन्छ्योककी सुडला साड दुक सिनी टि वे,

“मीतिवी मिककी माथोङ्गुप ताड नम्ज्योक माथोवु ताड नासाम मातङ्गुप तेरी ताम्डेतिवा कोन्छ्योकला डियङ्ज्ये कितुपतिवी थोकला खोकी टडिक क्यानी वे।”*

१०ती ताम्डेकी तेन्दोक ति कोन्छ्योककी दाक्पुला खोकी थु चाङ्मा नेमा हाक्को ज्यिकिवी, च्यिलासिसिन खोकी थु चाङ्माकी तेरी ताम्डे ति हाक्कोकिवी। सी साड हाक्पाकोवु कोन्छ्योककी नोवाला वोतुप छ्याककी ताम्डेतिवा साड खोकी हाक्कोकिवी। ११मी नोवाला

वोतुप ताम्डेतिवा ति खोरो सेमगी राड हाक्कोकिवी। ती दोके कोन्छ्योककी नोवाला वोतुप ताम्डेतिवा तेरी खोकी थु चाङ्माकी मिसिन सी साड हाक्को मुथुपी। १२त याड दाक्पुला जम्बुलिङकी सेम थोपुप मिन, कोन्छ्योककी थु चाङ्मा थोपुप यिन। कोन्छ्योककी दाक्पुला नङ्गुप मोलाम ति ल्यामो क्यानी हाक्को ज्यितुपला खोकी दाक्पुला खोकी थु चाङ्मा नङ्गुप यिन। १३तुक क्यानी डियरा ख्याप्टाक क्यावु सुड ति मी रिक्पा नेमा ख्याप्टाक क्यावु मिन, खोकी थु चाङ्मा नेमा ख्याप्टाक क्यावु यिन। तमा खोकी थु चाङ्माकी ओडला मिजी क्योङ्गुप मीतिवाला ति खोकी थु चाङ्माकी ओड नेसुर वुङ्गुप ताम्डे टेङ्बु ख्याप्टाक क्यायिन। १४खोकी थु चाङ्मा मेतुप मी तीकी खोकी थु चाङ्मा नेसुर वुङ्गुप ताम्डेतिवा सेमला मलङ्गिगी। च्यिलासिसिन तिवी तुका ताम्डेतिवाला तेन्दोक मेतुप यिन सिनी सिवी। तमा तिवी हाक साड मोकोवी। तुका ताम्डेतिवा खोकी थु चाङ्मा नेमा तिराड हाक्को थुप्किवी। १५कोन्छ्योककी थु चाङ्मा वोतुप मी तीकी तेरी ताम्डेतिवा ल्यामु वोतुप मेतुप ल्हेवी, यिने ती मी तीला मी यम्बा सी साड ल्यामु वोतुप मेतुप ल्हा मुथुपी। १६च्यिलासिसिन कोन्छ्योककी सुडला दुक सिनी टि वे,

“सी कोन्छ्योककी थु चाड्माकी
नोवाला हाक्को थुप्किवी
रो?

सी खोला लोप थुप्किवी रो?”

यिने दाक्पी मुला याड ख्रीष्टकी सेम
वे।*

चर्चकी मीतिवी पर्ला ख्ये पेतुप कोर्ला

३ अच्युनुपतिवा, ड ख्यिरा मुला
ताम्डे कितुप पेला कोन्छ्योककी
थु चाड्मा वोपुप मीतिवी मुला ताम्डे
क्यावु दोके माक्या, यिने जम्बुलिङकी
ओडला वोतुप मीतिवाला दोके ताड
ख्रीष्टला मलोक तेपा क्यावु तप्की
आडा टिकपेतिवाला क्यावु दोके ताम्डे
क्यायिन। २डे ख्यिराडला नुम थुङ्गुप
आडा टिकपेतिवाला दोके हाक्को
थुपुप येन्देन तिराड बिनिन, समा
क्योङ्बु दोके हाक्को मुथुपुप येन्देन
ति माबिन। च्यिलासिसिन तोजो पेला
ख्यिरा कले वोतुप येन्देनतिवा हाक्को
मुथुपुप वे, तरोड साड तुकै राड वे।
३ख्यिराड तेपा क्यासिनाड तरोड
साड जम्बुलिङकी ओडला वोतुप
मीतिवा दोके राड वे। च्यिलासिसिन
ख्यिरा पर्ला ठतोक कितुप ताड खाँदा
कितुप किवी। ख्यिराड तुक कितुप ति
जम्बुलिङकी ओडला वोतुप मीतिवी
क्यावु दोके मिन रो? ४ख्यिराड
ललाइकी “ड पावलकी मी यिन।”,

तमा ललाइकी “ड ति अपोल्लोसकी
मी यिन।” सिनी खाँदा किनोक
लो। ख्यिरा तुक कितुप ति थोसिमा
ख्यिराड ति जम्बुलिङकी ओडला
वोतुप मीतिवा दोके यिन सिरुप ति डे
हाक्कोसुड।

५काड अपोल्लोस ति सु यिन
रो? पावल ति सु यिन रो? ड्यिरा
ख्याप्टाक क्यावु कोन्छ्योककी
सुड थोनी ख्यिरा तेपा क्यावु यिन।
ड्यिराड याड कोन्छ्योकला शब्ज्यी
कितुप मी तिराड यिन। ६दी ति
चुशिड जुवु पे दोके यिन। चुशिड ति
डे चुयिन, तमा छ्यु ति अपोल्लोसकी
लुकसुड, यिने तीला ग्या ज्यितुप ति
याड कोन्छ्योक राड यिन। ७तुक
क्यानी चुशिड जुवु ताड छ्यु लुकुप ति
खक्छ्येवु मिन, यिने तीला ग्या ज्यितुप
कोन्छ्योक ति खक्छ्येवु यिन।
८तमा जुवु ताड छ्यु लुकुप ति छ्ये
साड मिन, छ्युडा साड मिन, तिवा
च्यिक्पा राड यिन। कोन्छ्योककी
तिवा रे रेला तिवी चो हुर्ताक क्यावे,
तोजोयी राड ल नङ्गिगी। ९ड्यिराड
ति कोन्छ्योककी थोक्ला मुला राड
लाका कितुपतिवा तिराड यिन। तमा
ख्यिराड ति कोन्छ्योककी शिड ताड
खोकी जोवु खाड्बा यिन।

१०कोन्छ्योककी डला नङ्गुप
कटिनकी राड ड ति खाड्बा जोप
मी खामु दोके डम्ज्यी तिड्यिन। तमा

यम्बातिवी ती डम्ज्यी खला खाड्बा जेवी। तमा खाड्बा जोपतिवी चुक क्यानी जो गोकिवी सिनी नासाम ल्यामु तोड गोकिवी। ११ च्यिलासिसिन कोन्छ्योककी खाड्बा जोपला डम्ज्यी तिङ्नी वे, ती डम्ज्यी ति चोवो येशू ख्रीष्ट यिन। ख्रीष्टकी मिसिन यम्बा सी साड ती डम्ज्यी दिड मुथुपी। १२ दोजो दी डम्ज्यीकी खला मी ललाइकी सेर थ्वोनी खाड्बा जोसुड, ललाइकी डुलकी खाड्बा जोसुड, तमा ललाइकी गोड नावु च्यालक थ्वोनी खाड्बा जोसुड, तमा ललाइकी शिड ताड च ताड सोड्मा थ्वोनी खाड्बा जोसुड सिसिन, १३ तुका मीतिवा रे रेकी लाका ति कोन्छ्योककी छ्या देन्गिवी। च्यिलासिसिन खोकी ठिम क्या नङ्गुप तुजेला तिवी क्यावु लाका ति ठछ्येली थोड्गिवी। तमा सु सुकी चुका चुका लाका क्यानोक सिनी मे थ्वोनी ज्हेनी ल्हेवी। १४ मेला ज्हेनी ल्हासिमा ती खाड्बातिवा माछिक्सुड सिसिन, तीला कोन्छ्योककी छ्यक्तक नड्गिवी। १५ दोजो मी ललाइकी जोवु खाड्बा ति मेला छिक्सुड सिसिन ती खाड्बा ति ना गल्नी तीला कुन फोकिवी। यिने खुरुड ति मे नेसुर टो गलुप दोके क्यानी ज्होकिवी।

१६ ख्यिराडला छ्या वे? ख्यिराड ति कोन्छ्योककी ल्हडाड यिन। तमा खोकी थु चाड्मा ति ख्यिरा मुला

ज्युकिवी। १७ दोजो मी ललाइकी कोन्छ्योककी ल्हडाडला ना तोड्गिवी सिसिन तीला साड कोन्छ्योककी ना तोड्गिवी। च्यिलासिसिन कोन्छ्योककी ल्हडाड ति चाड्मा वे। ती ल्हडाड ति ख्यिराड राड यिन।

१८ सी साड खोरो राड खुरुडला क्येन फोकुप मोजोशी। ख्यिराड सु दी जम्बुलिडला रिक्पा वोतुप यिन सिनी नोकिवे, ती ति रिक्पा मेतुप दोके च्युड्शी। तुक क्यासिन ख्यिराड रिक्पा वोतुप च्युड्गिवी। १९ च्यिलासिसिन दी जम्बुलिडकी रिक्पा ति कोन्छ्योककी थोड्दाडला काड साड मिन। ती तप्की कोन्छ्योककी सुडला दुक सिनी टि वे, “रिक्पा वोतुपतिवी च्यड्बु क्यानी लाका मेलोवा क्यावु तप्की ती ति खुरुड राड ना डिवी”*

२० येलुड यम्बा कोन्छ्योककी सुडला दुक सिनी साड टि वे, “रिक्पा वोतुपतिवी सेम चुकै वे सिरुप ति कोन्छ्योकला तेरी छ्या वे। तिवी रिक्पा ति काड साड फेन मोथोवी।”*

२१ तुक क्यानी सी साड मीतिवाला तेके मिकिशी। च्यिलासिसिन तेरी ति ख्यिरा तिराड यिनो। २२ तीकी तेन्दोक ति पावल यिन्शी, अपोल्लोस यिन्शी, पत्रुस यिन्शी, जम्बुलिड यिन्शी, मिजी यिन्शी, याड्ना शेष यिन्शी, तसाम पेला यिन्शी, याड्ना ज्युक्थमा यिन्शी, तेरी ख्यिरा तिराड यिन। २३ तमा

ख्यिराड ती ख्रीष्टकी ति यिन, ख्रीष्ट ती कोन्छ्योककी ति यिन।

ख्रीष्टकी लोमा छ्येतिवी लाका

४ तुक क्यानी ड्यिराड ति येशू ख्रीष्टकी लावातिवा यिन्दुप ताड छ्याकला वोतुप कोन्छ्योककी ग्येल्खापकी कोर्ला शब्जयी कितुप मी यिन सिरुप ति मीतिवी हाक्को गोकिवी। २तो जो तिराड मिन, कोन्छ्योककी ग्येल्खापकी कोर्ला शब्जयी कितुप मीतिवा ति खोड्तेर्मु वुड गोकिवी। ३तमा ख्यिरा डला क्यान बिन्सिनाड, याडना सी डला ठिम्खाडला क्याल्सिनाड ती ति डे थोक्ला काड साड मिन। ड राडला साड क्यान फोकुप लाका मिकी। ४ड टेड्बु वे सिरुप ति डला छ्या वे, यिन्सिनाड कोन्छ्योककी थोड्दाडला ति ड टेड्बु मे। डला ठिम क्या नङ्गुप याड कोन्छ्योक राड यिन। ५तुक क्यानी ख्यिराड कोन्छ्योककी ठिम क्या नङ्गुप सिनाड गोमाला के सुला साड ठिम माकी। चोवो येशू फेपुप पर सेक गुसा। दाक्पी सी साड हाक्माकोवा क्यानी क्यावु लाका ल्यामु मेलोवा ति तेरी खोकी ठछ्येली थोड्गिगी। मी सेमगी नोवातिवा साड ठछ्येली छ्या देन्गिगी। ती पेला मीतिवा रे रेला कोन्छ्योककी “ख्यिरा छासे को छ्येसुड।” सिनी सुड्गिगी।

६अच्युनुपतिवा, ख्यिराडला ल्यामु वुड्शी सिनी ड ताड अपोल्लोसकी

कोर्ला पड्बु बिन्नी दी ताम्डेतिवा डे ख्यिराडला टिवु यिन। ड्यिरा तुक क्यावु ति ख्यिराड कोन्छ्योककी सुडला सुङ्गुप दोके क्यानी मिजी क्योड्शी सिनी यिन। तुक क्यानी ख्यिराड सु साड “ती मी ति छ्ये यिन।”, “ती मी ति छ्युडा यिन।” सिनी ताम्डे माकी। ७सी ख्यिराडला मी यम्बा सिनाड छ्ये यिन सिनी सिक्क्यासुड? ख्यिरा मुला वोतुप तेरी मोलामतिवा कोन्छ्योककी ख्यिराडला नङ्गुप मिन रो? यिन्सिनाड ख्यिराड च्यिला तेके किवी?

८ए, त याड ख्यिराडला गोवु च्यालकतिवा तेरी थोप्नी ख्यिराड छ्युकपु गाल्सुड। ए, त याड ड्यिराड मेसिनाड ख्यिराड ग्येल्बु दोके च्युड्सुड। वुतुड के ख्यिराड ग्येल्बु यिन्दुप यिन्सियाड ड्यिराड साड ख्यिरा मुला राड ग्येल्बु कितुप ड्येतुप्जा। ९यिने डला दुका नासाम यी शर्किनोक, ड्यिराड ख्रीष्टकी लेन ल्यामु ख्याप्टाक कितुप लोमा छ्येतिवाला याड कोन्छ्योककी मी मिङ्गाला सेतुप छ्येर्पा बिन्नी तेरी सिनाड छ्युडा जो नड वे। ड्यिराड याड देवाच्येनकी लेन क्योलुप थुतिवा ताड जम्बुलिङकी मीतिवी दोड्ला ल्हेर्मु छ्या देन्दुप च्युड्सुड। १०ए, ड्यिराड याड ख्रीष्टकी थोक्ला रिक्पा मेतुप च्युड्सुड, यिने ख्यिराड ति खोकी जोसालेन्सिन रिक्पा वोतुप च्युड्सुड। ड्यिराड डार मेतुप गल

वे, यिने ख्यिराड ति डार वोतुप गल वे। ख्यिराडला ताड्देन ड्येनी वे, यिने ड्यिराडला याड मीतिवी मारे ताड्सुड। ११तन्दा सेक ड्यिराड ल्होतुड्बा ताड कोम्बा लावु ताड प्तुड्बा सिड वे। मीतिवी ड्यिराडला दुड्यिन वे, तमा ड्यिरा खाड्बा शिड साड मे। १२साप ताड कोन्दुपकी थोक्ला ड्यिरा राड लाका टेमु कियी वे। मीतिवी ड्यिराडला मोताप तप्सिनाड ड्यिरा तिवाला मोलाम तेर्किवी। दुक्पा बिन्सिनाड हम क्या देकिवी। १३तिवी ड्यिराडला मारे ताड्सिनाड तिवाला ड्यिरा ताम्डे ल्यामो किवी। तन्दा सेक ड्यिराड जम्बुलिडकी मीतिवी थोड्दाडला ज्यरा ज्यिरा ताड थल्दुक दोके गल वे।

१४ख्यिराडला डोछा लोड्गुप सिनी दी यिकी टिवु मिन, डे ड्यिराड्ज्येवु आडातिवाला दोके क्यानी टोड्गु तेरुपला टिवु यिनो। १५येशू ख्रीष्टकी कोर्ला ख्यिराडला लाम तेरुप मीतिवा याड तोड्डा च्यिथम्बा चोयी वोज्यिवी, यिने पपा ति च्यिक राड वे। डे ख्यिराडला ख्रीष्ट येशूकी थोक्ला लेन ल्यामु ख्याप्टाक क्यावु तप्की ड ति ख्यिरा पपा दोके च्युड वे। १६तुक क्यानी ख्यिराड डे दोके लुमु सेतुप वुड गोकिवी सिनी ड ख्यिराडला ठाकुरे सिरिन। १७ती तप्की तिमोथीला ड ख्यिरा ते तोड्यिन वोतो। ती ति येशू ख्रीष्टला तेपा कितुप छासे ड्यिराड्ज्येवु

डे पुज्युड यिन। दासा तेरीला वोतुप चर्चकी मीतिवाला डे लापुप दोके ड चुक क्यानी येशू ख्रीष्टकी कला युनी मिजी क्याड्सुड सिरुप ताम्डे ति तीकी ख्यिराडला टेन्सो कि ज्यिकितो।

१८ख्यिरा पर्ला मिरा चोकी याड ड ख्यिरा ते मेडिगवी नोक्यानी छ्येजु क्यानी युकिनोक। १९यिने कोन्छ्योककी नोवा वोसिन, ड ख्यिरा ते टिम्बु राड वुड्गुप्नो। तमा छ्येजु कितुपतिवी ताम्डे ति कोन्छ्योककी डार नेमा वावु यिनोक मिनोक सिनी ड हाक्कोवा कितिन। २०च्यिलासिसिन कोन्छ्योककी ग्येल्खाप ति ताम्डेला मिन, यिने खोकी डारला वे। २१ख्यिरा नासाम काड वे? ड ख्यिरा ते वुड्गुप पेला ख्यिराडला वोरु देन्दुपला वुड्गुप की, सेम बोल्मु क्यानी ड्यिराड्ज्ये कितुपला वुड्गुप?

शम्डेन कितुपतिवी कोर्ला येन्देन

५ ड ख्यिराडला ताम्डे च्यिक सिरिन। ख्यिरा पर्ला शम्डेन कितुपतिवा वे सिरुप ति डे थोसुड। तुका शम्डेन कितुप लाका याड कोन्छ्योकला डो माशेवु मीतिवी पर्ला साड मेडिगवी। ख्यिरा पर्ला ललाइकी खोरो उरु आमाला साड पेर्मीला ज्याक्नोक सिनोक। २ती हाक्कोसिनाड ख्यिराड अम्बारडिशड किवी? काड ख्यिरा याड तीकी थोक्ला सेम्दुक कि गोवु मिन रो? तुका लाका मेलोक्पा कितुप मीला ख्यिरा

पर नेमा तेन तोड गोवु ति यिन्जा। ३ड ख्यिरा मु नेसुर थाक्किड्बु वोसिनाड डे सेम ति ख्यिरा मुला राड वे। ती तप्की ड ख्यिरा पर्ला मेसिनाड वोतुप दोके क्यानी तुका लाका मेलोवा कितुप मीला डे ठिम क्यायिन। ४ख्यिराड दाक्पी चोवो येशूकी मिडला जोम्बुप पेला डे सेम साड ख्यिरा पर्ला राड गिवी। तमा दाक्पी चोवो येशूकी ओड साड ते गिवी। ५ती पेला तुका लाका मेलोक्पा कितुप मी ति शैतानला चेक ते! तुक क्यासिन तीकी जु ति नाडोशी, यिने तीकी सेम ति चोवो फेपुप तुजेला ज्होक्शी। ६ख्यिराड अम्बारडिशड कितुप ति ल्यामु मिन। खमीर चेयी लुकनी टम्दोक ड्येसिन तेरी टम्दोक ति बोकिवी सिरुप ति ख्यिराडला छ्या मे? ७तुक क्यानी ख्यिरा गोमाला क्यावु दिक्पातिवा ति टम्दोक नाड्ला लुकुप खमीर यिन। ती तप्की ख्यिरा खमीर डियड्बा दोके वोतुप शम्डेन कितुप मीला तेन्नी तोड! तमा ख्यिराड खमीर मालुकुप टम्दोक दोके टेड्बु डिवी। गोमाला यहूदीतिवा मिश्र लुड्बा नेसुर थरुप पेला लुक रुक सेनी जिन्बा ताड्सुड। ती दोके क्यानी चोवो येशू ख्रीष्ट ति यहूदीतिवा थरुप तुछ्येनला सेतुप लुक रुक च्युड्नी दाक्पुला दिक्पा ने थर ज्यितुपला टुड्सुड। ८तुक क्यानी दाक्पी दुक्टा ताड सेम नक्पातिवा यिन्दुप खमीर

डियड्बा लुकुप शुब्ज्याड सोनी मिन, खोनक्पु मेतुप ताड टेड्बुकी खमीर मालुकुप शुब्ज्याड सोनी यहूदी थरुप तुछ्येन तेन्दुप।

९गोमाला साड डे ख्यिराडला शम्डेन कितुपतिवी दला माशुक सिनी यिकी टिनी तड्गुप यिन। १०तीकी तेन्दोक ति दी जम्बुलिडकी शम्डेन कितुपतिवा ताड देर्पा कितुपतिवा ताड कुन कितुपतिवा ताड कुला छ्यो तोड्गुपतिवी मुला नाम्साड तम्जी माजो सिक्पावु ति मिन। मिसियाड ख्यिराड दी जम्बुलिड नेमा पाड्ला थेन्नी डो गोकिवी। ११चुका मी तीकी ड कोन्छ्योकला तेपा कितुप मी यिन सिवी, यिने शम्डेन कितुप ताड देर्पा कितुप ताड कुला छ्यो तोड्गुप ताड मीला डियर्मु कितुप ताड छ्याड्गेले कितुप याड्ना कुन किवी सिसिन, तुका मीतिवी मुला तम्जी माजो, तिवी मुला देनी समा साड मासा। १२च्यिलासिसिन कोन्छ्योकला तेपा मिकिवु मीतिवाला ठिम कितुप ति डला काड ख्येप्साड वे रो? काड चर्चकी तेपा कितुप मीतिवाला ख्यिरा राड ठिम तोड मोगोवी रो? १३तेपा मिकिवु मीतिवाला ठिम क्या नड्गुप ति कोन्छ्योक यिन। तुक क्यानी कोन्छ्योककी सुडला साड टि वे, “काड ख्यिरा पर्ला वोतुप मी दुक्टातिवाला तेन्नी तोड!”*

तेपा कितुप मीतिवी पर्ला शुवा ग्यकुप मेवी

६ ख्यिरा पर्ला मिरा च्यिक ति यम्बा नुप ताड मुला थमु शोर्सुड सिंसिन ख्यिराड ठिम कितुपला कोन्छ्योकला तेपा कितुपतिवी ते मागल्नी च्यिला कोन्छ्योकला डो माशेवु मीतिवी ठिम कितुप ठिम्खाडला डिवी? २ज्युक्ला कोन्छ्योकला तेपा कितुप मीतिवी जम्बुलिडला ठिम तोड्गिगी सिरुप ति ख्यिराडला छ्या मे रो? काड दी जम्बुलिडला ठिम कितुप छ्या वोसिन तुका खाँदा टिकपेतिवा डिक्नी तेरुप ति ख्यिराडला ओड मे? ३काड देवाच्येनकी लेन क्योलुप थुतिवाला साड ज्युक्ला दाक्पी ठिम किवी सिरुप ति ख्यिराडला छ्या मे रो? तुक क्यानी दी मिजीला वुड्गुप जम्बुलिडकी खाँदातिवा ति दाक्पी डिक् मुथुवी रो? ४ख्यिरा पर्ला तुका खाँदातिवा वोसिन च्यिला ख्यिराड कोन्छ्योकला डो माशेवु मीतिवी ठिम कितुप ठिम्खाडला डिवी? तुका मीतिवाला याड चर्चकी काड ताड्देन मिकिवी। ५दी ताम्डे ति ड ख्यिराडला डोछा लोड्गुपला सिरिन। ख्यिरा पर्ला खाँदा शोर्सिन डिड तेरुप रिक्पा वोतुप मी ति ख्यिरा पर्ला च्यिक साड मे रो? ६यिने ख्यिरा पर्ला मिरा च्यिक ति यम्बा नुप ताड मुला थमु शोर्सिन ती डिक्पुपला ख्यिराड कोन्छ्योकला तेपा मिकिवु मीतिवी ठिम्खाडला डिवी?

७ख्यिराड च्यिककी च्यिकला शुवा ग्यकुप ति ल्हासिन ख्यिराड कोन्छ्योकला तेपा मिकिवु मीतिवा दोके यिन सिनी हाक्कोकिवी। काड ख्यिराडला ड्यप्ये क्यासिनाड हम क्यानी दे मुथुवी? ख्यिराडला मी यम्बी क्येन्सिनाड हम क्या देसिन मेवी रो? ८यिने ख्यिराड याड तेपा कितुप अच्युनुपतिवी पर्ला राड च्यिककी च्यिकला क्येन्दुप ताड मेलोवा किनोक।

९दुकटा कितुप मीतिवा कोन्छ्योककी ग्येल्खापला लेप मुथुपी सिरुप ति ख्यिराडला छ्या मे? ल्यामु क्यानी हाक्कोवा की। छ्येवु छ्येमु कितुपतिवा, कुला छ्यो तोड्गुपतिवा, शम्डेन कितुपतिवा, ख्योक्पेजा ख्योक्पेजी पर्ला राड शम्डेन कितुपतिवा, १०कुन कितुपतिवा, देर्पा कितुपतिवा, छ्याड्गोलेतिवा, मीला मारे तोड्गुपतिवा, च्याक्पा कितुपतिवा ति कोन्छ्योककी ग्येल्खापला लेप मुथुपी। ११गोमाला याड ख्यिराड साड ललाइ तुकै राड नोक। यिने त याड चोवो येशू स्त्रीष्ट ताड दाक्पी कोन्छ्योककी थु चाड्मा नेमा ख्यिरा दिक्पातिवा तानी ख्यिराड टेड्बु ताड चाड्मा च्युड वे।

रड्गी मिजी ने कोन्छ्योकला ताड्देन कितुप कोर्ला

१२ख्यिरा पर्ला मी ललाइकी “ड ति काड क्यासिनाड गिवी।” सिनी सिवी,

यिने ती तेरी ताम्डे ति ख्येप्साड वोतुप ति मिन। ड ति काड क्यासिनाड गिवी, यिने चुका ताम्डेकी ओडला साड ड ति योक्पु मेदे। १३तमा यम्बातिवी “समा ति सुपकी थोक्ला यिन, सुप ति समी थोक्ला यिन।” सिनी सिवी, यिने कोन्छ्योककी दिवा ड्रियकरला ड्रियम्जियक फेन मोथोवु जेवी। दाक्पी जु ति शम्डेन कितुपकी थोक्ला मिन, चोवो येशूला शब्ज्यी बुलुपला यिन। तमा चोवो येशूकी दाक्पी जुला गोवु तेरी च्यालकतिवा नड्गिगी। १४कोन्छ्योककी खोरे ओड नेमा राड चोवो येशूला टुड्नी डोसु लाड्सुड। तुक क्यानी दाक्पुला साड खोकी ओड नेमा शेष ने सेन्बु लोड्गिगी। १५ख्यिरा जु ति चोवो येशू ख्रीष्टकी येन्लक यिन सिरुप ति ख्यिराडला छ्या मे? काड ड ति खोकी जु ति छ्येमुतिवी मुला शम्डेन कितुप जोप्जा? मिन, तुकै नाम्साड कितुप मेड्गिगी। १६छ्येमुतिवी मुला शम्डेन कितुप मी जु ति छ्येमु ताड च्यिक्पा राड डिवी सिरुप ति ख्यिराडला छ्या मे? च्यिलासिसिन कोन्छ्योककी सुडला साड दुक सिनी टि वे, “तिवा ड्यी ति जु च्यिक् राड डिवी।” * १७यिने चुका मी ति चोवो येशू ताड मुला च्यिक्पा राड च्युड्गिगवे, ती मी ति खोकी थु चाड्मा ताड मुला च्यिक्पा राड च्युड्गिगी।

१८तुक क्यानी ड ख्यिराडला सिरिन, शम्डेन कितुप नेसुर कुतुक दे। मीतिवी क्यावु यम्बा दिक्पातिवा तेरी खोरो जुकी फिला मेलोवा जेवी, यिने शम्डेन कितुप मी तीकी खोरो जुला राड मेलोवा जेवी। १९ख्यिरा जु ति कोन्छ्योककी थु चाड्मा ज्युवु दासा यिन सिरुप ति ख्यिराडला छ्या मे? ती थु चाड्मा ति कोन्छ्योककी ख्यिराडला नड्गुप यिन। तमा ख्योरो मिजी ति ख्योरो ति मिन। २०ख्यिराड ति खोकी गोड तेनी ड्योवु यिन। तुक क्यानी ख्यिरा रड्गी मिजी ने कोन्छ्योकला मोवा की।

जेन्दीकी कोर्ला

७ ख्यिरा डला मीतिवी जेन्दी माक्यावु राड ल्यामु यिन सिनी यिकी टिनी तड्गुप कोर्ला ताम्डे कितुप। २ड ख्यिराडला काड सिरिन सिसिन, शम्डेन कितुप नासाम बडी शरुप तप्की ख्योकपेजातिवी दाक दाक्पी थोक्ला पेर्मी लड्शी, पुम्पेजातिवाला साड दाक दाक्पी थोक्ला ख्योवा वोशी। ३ख्योवाकी खोरो पेर्मीकी थोक्ला कि गोवु लाका ति तेरी की, पेर्मीकी साड खोरो ख्योवी थोक्ला कि गोवु लाका ति तेरी की। ४पेर्मीकी खोरो जुला खोरो राड ओड्ज्येन मिकिवी, यिने तीकी ख्योवी ओड्ज्येन किवी। तुक राड

क्यानी ख्योवी साड खोरो जुला खोरो राड ओङ्ज्येन मिक्किवी, यिने तीकी पेर्मीकी ओङ्ज्येन किवी। ५ख्योवा ताड पेर्मी च्यिककी च्यिकला मुला राड डियलोकुप कोर्ला मेवी सिनी मासिर। ख्यिराड मुला राड ताम्डे क्यानी चेयी पर सेक मोपोर तिराड कितुपला कुतुक देसिनाड यम्बा पेला ति मुला राड दे। मिसियाड ख्यिराड सेम डेकला दे माथुप्नी शैतानकी खोकपा लहापला ख्येल्गिगी। ६दी ताम्डे ति डे ख्यिराडला क बिन्दुप दोके ति मिन, यिने तुक क्यासिन गिगी सिक्क्यावु यिन। ७तेरी मीतिवा ड दोके जेन्दी माक्यानी देसिन गिगी सिरुप ति ड नो कितिन। यिने तेरीला कोन्छ्योक नेमा दाक दाक्पी थोकला कटिनकी ड्येम्बा कुतुक कुतुक थोप्नी वे। च्यिकला ति कटिनकी ड्येम्बा कुतुक, यम्बाला ति कटिनकी ड्येम्बा कुतुक थोप्नी वे।

८त जेन्दी माक्यावुतिवा ताड युक्समतिवी कोर्ला ड काड सिरिन सिंसिन, तिवा साड ड दोके जेन्दी माक्यावा क्यानी देसिन ल्यामु यिन। ९यिने तिवा सेम डेकला ज्योक मुथुपी सिंसिन जेन्दी किशी। च्यिलासिसिन सेम डेकला ज्योक मुथुवु सिनाड बोरु जेन्दी क्यावु राड ल्यामु यिन।

१०त जेन्दी क्यावुतिवाला ड चोवो येशू नेमा वावु क तेरिन, पेर्मीतिवा ख्योवा ताड मुला नाम्साड माटल्शी। ११दोजो टल्सिनाड तीकी जेन्दी ति

मिक्किशी। बोरु येलुड खोरो ख्योवी मुला राड थिन्नी देशी। ख्योवी साड खोरो पेर्मीला मेडेल्शी।

१२तमा यम्बातिवाला ति ड चोवो येशू नेमा वावु क ति मिन, यिने ड टोङ्गु तेरिन। दोजो येशूला तेपा कितुप मी मिरा च्यिककी ति तेपा मिक्किवु पेर्मी वे, यिने ती ति खोरो मुला राड देतुप नो किसिन तीला टल्नी मोज्योक्शी।

१३तुक राड क्यानी दोजो येशूला तेपा कितुप पुम्पेजा मिरा च्यिककी ति येशूला तेपा माक्यावु ख्योवा वे, यिने ती ख्योवा ति खोरो मुला देतुप नो किसिन तीला टल्नी मोज्योक्शी।

१४च्यिलासिसिन तेपा मिक्किवु ख्योवा ति तेपा कितुप पेर्मीकी जोसालेन्सिन कोन्छ्योककी थोङ्दाडला टेड्बु च्युङ्गिगी। तेपा मिक्किवु पेर्मी साड तेपा कितुप ख्योवी जोसालेन्सिन कोन्छ्योककी थोङ्दाडला टेड्बु च्युङ्गिगी। मिसियाड तिवी क्येवु पेजातिवा साड टेड्बु मुच्युङ्गिगी, यिने त याड तिवा टेड्बु राड च्युड वे। १५यिने येशूला तेपा मिक्किवु तीकी येशूला तेपा कितुप ख्योवा याङ्ना पेर्मीला टल्नी ज्योकिवी सिंसिन तिवा टल्सिनाड गिगी। तुक क्यासिन ख्योवी ओडला साड पेर्मी दे मोगोवी, पेर्मी ओडला साड ख्योवा दे मोगोवी।

कोन्छ्योककी दाक्पुला लोदिमु क्यानी देतुपला कताड नङ्गुप यिन। १६पेर्मीतिवा, ख्यिराडला छ्या वे, येशूला तेपा कितुप पेर्मीकी खोरो तेपा

माक्यावु ख्योवाला थर ज्यि थुष्किवी, तमा येशूला तेपा कितुप ख्योवी साड तेपा माक्यावु खोरो पेर्मीला थर ज्यि थुष्किवी।

कोन्छ्योककी कतङ्गुप दोके मिजी क्योङ्गुप

१७ चोवो येशूकी मीतिवा रे रेला चुकै लाका नड वे, कडगी थोक्ला कताड नड वे, ती दोके राड मिजी क्योङ्गुशी। दी ति तेरी चर्चतिवाला डे लापुप येन्देन यिन। १८ मी ललाइला कोन्छ्योककी कताड नङ्गुप पेला गोमाला के यहूदीतिवी च्येतुप लुकसु क्या वे सिसिन तीकी च्येतुप लुकसु क्यावु ति तुकै राड देशी। मी ललाइ च्येतुप लुकसु माक्यासिनाड खोकी कताड नाङ्सुड सिसिन तीकी च्येतुप लुकसु कितुप नो मिकिशी। १९ च्येतुप लुकसु क्यावु ताड माक्यावु ति खक्ख्येवु मिन, यिने कोन्छ्योककी कला ड्येन्दुप ति खक्ख्येवु यिन। २० कोन्छ्योककी मीला चुकै वोतुप पेला कताड नड वे, तुकै राड देशी। २१ दोजो कोन्छ्योककी ख्युरुडला कताड नङ्गुप पेला ख्युरुड योक्पुला वोसिन ख्युरुड पप माकी, यिने ती नेसुर थर थुप्सिन थरुप छोल। २२ च्यिलासिसिन कोन्छ्योककी कताड नङ्गुप पेला सु योक्पु नोके, ती ति त याड थर्नी कोन्छ्योककी गिपा च्युङ्गुप यिन। तुक राड क्यानी सु मी यम्बी ओडला मेवे, तिवाला कोन्छ्योककी कताड

नङ्गुप पेला ख्रीष्टकी थोक्ला शब्ज्यी कितुप योक्पु यिन। २३ कोन्छ्योककी ख्यिराडला येशू ख्रीष्टकी ठककी गोड तेनी ड्योवु तप्की ख्यिराड मीतिवी योक्पुला मादे। २४ तुक क्यानी अच्युनुपतिवा, कोन्छ्योककी सुला चुकै वोतुप पेला कताड नड वे, तुकै राड क्यानी ती मी ति कोन्छ्योककी मुला तम्जी ल्यामु जोनी देशी।

जेन्दी माक्यावु मीतिवा ताड युक्सिमतिवी कोर्ला

२५ त जेन्दी माक्यावु मीतिवी कोर्ला याड चोवो येशू नेमा काड साड क मे। यिने कोन्छ्योककी च्यम्बाकी डला खोङ्तेर्मु जो नङ्गुप तप्की ड ख्यिराडला टोङ्गु तेरिन। २६ तसाम पेकी दुका छेटाड दुडल बडी वोतुप नासाम तडिसन चुकै नोके तुकै राड देतुप ल्यामु यिन सिरुप ति डला नासाम वे। २७ काड ख्यिरा जेन्दी क्या वे? जेन्दी क्या वोसिन पेर्मी ताड मुला टलुप नो माकी। काड ख्युरुड जेन्दी माक्यानी देन वे? तुकै यिन्सिन जेन्दी कितुप माछोल। २८ यिने ख्योरो जेन्दी क्यासिनाड ती ति दिक्पा मिन, तमा पुम्पेजा नाज्युडकी जेन्दी क्यासिनाड ती ति दिक्पा क्यावु मिन। यिन्सिनाड जेन्दी क्यावु मीतिवी दी मिजीला दुक्पा बडी खुर गोकिवी। तुक क्यानी ख्यिराडला दुक्पा मेङ्गेशी सिरुप ति डे नोवा वे। २९ अच्युनुपतिवा, डे सिक्पावु ताम्डे ति दी राड यिन। तिङ्गी

तुजे वा वे। तफेन्ला पेर्मी वोतुपतिवा पेर्मी मेतुप दोके क्यानी कोन्छ्योककी थोकला शब्ज्यी पुलनी दे। ३०तमा पप क्यानी डोपतिवा माडुवा क्यानी देशी। गा कितुपतिवा गा मिकिवुतिवा दोके क्यानी देशी, इयोप्चे ग्यकुपतिवा खोरो लोला काड साड मेतुप दोके जोनी देशी। ३१दी जम्बुलिडला देतुप पेला गोवु च्यालकतिवा थोकुप ति गिवी, यिने ती च्यालकला तिराड नासाम मातोड। च्यिलासिसिन दी जम्बुलिडकी च्यालकतिवा याड तोर्नी डिवी।

३२ख्यिराड तेरी पप मिकिशी सिरुप ति डे नोवा वे। जेन्दी माक्यावु मी तीकी चुक क्यानी कोन्छ्योकला गा लोड्गुप सिनी कोन्छ्योककी थोकला तिराड नासाम तोड्गिगी, ३३यिने जेन्दी क्यावु मी तीकी खोरो पेर्मीला चुक क्यानी गा लोड्गुप सिनी जम्बुलिडकी ताम्डेला पप क्यानी ३४तीकी सेम ति यिसिक मिसिक डिवी। तुक राड क्यानी जेन्दी माक्यावु पुम्पेजा नाज्युडकी साड खोरो मिजी ताड सेम ति चुक क्यानी टेड्बु जोनी देतुप सिनी कोन्छ्योककी थोकला तिराड नासाम तोड्गिगी, यिने जेन्दी क्यावु पुम्पेजा तीकी खोरो ख्योवाला चुक क्यानी गा लोड्गुप सिनी जम्बुलिडकी ताम्डेला तिराड पप किवी। ३५डे दी ताम्डेतिवा सिक्कावु ति ख्यिराडला ग्येकुपला मिन, यिने ख्यिराड मिजी टेड्बु क्योड्गुप ताड चोवोकी थोकला सेम

च्यिक राड च्युड्नी शब्ज्यी कि थुप्शी सिनी सिक्कावु यिन।

३६दोजो मी ललाइकी खोरो जेन्दी कितुपला लड्गुप पुम्पेजा ताड मुला जेन्दी मिकितुप नासाम वासिनाड खोरो लड्गुप पुम्पेजाला जेन्दी मिकिवी सिरुप ति ल्यामु मिन, तमा ती पुम्पेजा ति जेन्दी कितुप पेला च्युड्गुप ताड खुरुडला जेन्दी कितुप नो वोसिन जेन्दी क्यासिन गिवी। तुक क्यावु ति दिक्पा मिन। तमा तिवा जेन्दी कि राड गोकिवी। ३७यिने चुका मी तीकी खोरो सेमला जेन्दी मिकिवु नासाम नोके, तीला सी साड कार माक्या वे, तमा खुरुड ति डेकला दे थुप्किवी सिनी खोरो लड्गुप पुम्पेजाला जेन्दी मिकी सिनी तेन्तेन क्यासिन तीकी ल्यामु राड क्यावु यिन। ३८तुक क्यानी चुका मी तीकी लड्गुप पुम्पेजाला जेन्दी किवे, तीकी ल्यामु राड क्यावु यिन। चुका मी तीकी जेन्दी मिकिवे, तीकी मड ल्यामु क्यावु यिन।

३९ख्योवा माशिवा सेक पेर्मी ति ख्योवी ओडला राड देकिवी, यिने ख्योवा शिसिमा तीकी खोरो सेमला गलुप ख्योकपेजा ताड मुला जेन्दी कि थुप्किवी। यिन्सिनाड ती ख्योकपेजा ति कोन्छ्योकला तेपा क्यावु वुड गोकिवी। ४०डे नासामला ती पुम्पेजा तीकी जेन्दी माक्यावा क्यानी देसिन तीला मड किर्मु गिवी। कोन्छ्योककी थु चाड्मा डे मुला ज्यु वोतुप तप्की डे दी ताम्डे सि थुप्किवी।

कुला तेकुप समी कोर्ला

त कुला पुलुप साप समी कोर्ला ड ख्यिराडला सिरिन। दाक्पु तेरीला रिक्पा वे सिरुप ति छ्या वे। यिन्सिनाड ती रिक्पाकी दाक्पुला ड राड यिन सिरुप जेवी। यिने ड्रियङ्ज्येकी मी यम्बाला दाल्जा कितुप जेवी। २दोजो मी ललाइकी खुरुड ति तेरी शेवु यिन सिनी नोकिवी सिसिन तीकी शे गोवु ति माशेवु गिवी। ३यिने ललाइकी कोन्छ्योकला ड्रियङ्ज्ये किवी सिसिन कोन्छ्योककी साड तीला डो शेकिवी।

४तुक क्यानी कुला पुलुप समा साप कोर्ला ताम्डे कितुप यिन्सिन दाक्पुला छ्या वे, दी जम्बुलिङकी कु ताड ल्हलुतिवा काड साड मिन, कोन्छ्योक ति च्यिक राड वोतुप कोन्छ्योक यिन। ५नामला याङ्ना जम्बुलिङला मिड तिराड वोतुप ल्हलुतिवा वे। तुका ल्हलुतिवा बडी वोसिनाड ६दाक्पी थोक्ला ति पपा कोन्छ्योक च्यिक राड वे। खोकी सुड नेसुर राड जम्बुलिङला वोतुप च्यालकतिवा तेरी ज्येसुड। दाक्पु साड कोन्छ्योककी थोक्ला मिजी क्योङ्गियन वे। तमा येशू ख्रीष्ट तिराड दाक्पी तेपा क्यावु चोवो यिन। खो नेसुर राड कोन्छ्योककी जम्बुलिङला वोतुप तेरी च्यालकतिवा ज्ये नाङ्सुड। तमा दाक्पुला मिजी नङ्गुप साड येशू ख्रीष्ट राड यिन।

७यिन्सिनाड तेरी तेपा कितुप मीतिवाला साड दी ताम्डेकी कोर्ला ल्यामु क्यानी छ्या मेवी। माङ्शोक मीतिवा गोमाला कुला छ्यो तोङ्गुप बानी गलुप तप्की तरोड साड समा साप पेला कुला तेकुप समा राड सयी वे सिरुप नासाम तोङ्गियन वे। तुक क्यानी तिवी ल्यामु मेलोवा हाक्माकोवु तप्की ती समा सोनी मेचेङ्गा गल वे सिरुप नासाम तोङ्गिगी। ८यिने साप समी दाक्पु कोन्छ्योककी चिप्ला टेङ्बु च्युड मुथुपी। साप समी दाक्पु कोन्छ्योककी थोङ्दाडला मेलोवा साड मोडोवी, ल्यामु साड मोडोवी। ९तुक क्यानी ख्यिराड च्याङ्से देता, ख्यिराड तेपा रम्बु वोतुपतिवी काड सोसिनाड गिवी, यिने ख्यिरा जोसालेन्सिन तेपा रम्बु मेतुपतिवा दिक्पाला ख्येल्लिगी। १०च्यिलासिसिन ख्यिराड तेपा रम्बु वोतुपतिवा ल्हडाड नाङ्ला देनी कुला तेकुप समा सोवु थोङ्गिसन तेपा रम्बु मेतुपतिवी साड डाडेड क्यानी साप नो मिकिगी रो? ११ख्योरो हाक्कोवु ताम्डेकी जोसालेन्सिन तेपा रम्बु मेतुप अच्युनुपतिवा दिक्पाला ख्येल्लिगी। दी ताम्डे ल्यामु नासाम तोड! तिवी थोक्ला राड येशू ख्रीष्ट टुङ्गुप यिन। १२ख्यिरा तुक क्यासिन तेपा रम्बु मेतुप अच्युनुपतिवाला दिक्पा कि ज्यिकिगी। तमा तिवी सेमला साड मेलोक्पा लड ज्यिकिगी। ती ति ख्रीष्टकी तेन्दोकला दिक्पा

क्यावु यिन। ^{१३}तुक क्यानी दोजो साप समी जोसालेन्सिन तेपा कितुप अच्युनुपतिवा दिक्पाला ख्येल्गिबी सिसिन, ड नाम्साड श मसा। तुक क्यासिन डे तेपा कितुप अच्युनुपतिवा दिक्पाला ख्येलुप नेसुर ज्होकिवी।

लोमा छ्येतिवी ओड

६ ड ख्यिराडला सिरिन, काड डला काड साड कितुप मेड्येवी रो? काड ड ति लोमा छ्ये मिन रो? काड डे चोवो येशूला माथोड वे रो? काड डे ख्यिराडला ख्याप्टाक क्यावु सुड थ्वोनी ख्यिरा ति सुडला तेपा क्यावु मिन रो? ^२मी यम्बी डला लोमा छ्ये मिन सिक्यासिनाड ख्यिरा थोक्ला ति ड लोमा छ्ये यिन, च्यिलासिसिन डे ख्यिराडला चोवो येशूकी कोर्ला लेन ल्यामु ख्याप्टाक क्यासिमा ख्यिरा खोला तेपा क्यावु तप्की ख्यिरा डला लोमा छ्ये यिन सिनी पड्बु तेर्किवी।

^३डे तेन्दोकला लड्गुप मीतिवाला डे सि गोवु ताम्डे ति दी राड यिन। ^४काड ड्यिराडला साप थुड्गुप ओड मे रो? ^५काड ड्यिराडला साड यम्बा लोमा छ्येतिवा ताड चोवो येशूकी नुपतिवा ताड पत्रुसकी दोके तेपा कितुप पेर्मी टिनी युक्प ओड मे रो? ^६काड ड ताड बारनाबासकी तिराड मिजी क्योड्गुपला लाका कि गोकिवी रो? ^७चुका मी तीकी रडगी

डोसुमला मक्मीकी लाका किवी रो? चुका मी तीकी गुन्डुम तप्सिमा गुन्डुम डेलु मासावी रो? चुका मी तीकी छ्युड्मा सोसिमा छ्युड्मी वोमा मथुड्गिगी रो? ^८डे सिक्यावु ताम्डे ति मी सिक्यावु ताम्डे तिराड मिन, कोन्छ्योककी सुडगी नाड्ला साड वे। ^९मोशाकी ठिम नाड्ला दुक सिनी टि वे, “स्वा ड्यिलुप पेला लाडगी खला खप्चिल माग्यक।”^{*} तुक सिक्यावु ति लाडतिवी कोर्ला कोन्छ्योककी पप क्यानी सुड्गुप मिन, ^{१०}ती सुड ति कोन्छ्योककी दाक्पी थोक्ला राड सुड्गुप मिन रो?दी तेरी ताम्डे ति दाक्पी थोक्ला टिवु यिन। च्यिलासिसिन शिड मोतुप ताड स्वा ड्यिलुप तीकी काड रे च्यिक रे ड्येतुप रेवा क्यानी लाका किवी। ^{११}दोजो ख्यिरा पर्ला सेन तपुप दोके ड्यिरा ख्यिराडला कोन्छ्योककी सुड ख्याप्टाक क्यासिमा ख्यिरा ड्यिराडला साप थुड्गुपला गोवु च्यालक ताड कोन्ज्ये लड्गिसन ख्यिराडला कले च्युड्सुड रो? ^{१२}यम्बा कोन्छ्योककी थोक्ला शब्ज्यी कितुपतिवी ख्यिराडला तुक राड साड लोड्गिगी सिसिन, ड्यिरा याड ख्यिराडला ती सिनाड मड लोड्गुप ओड वे। यिन्सिनाड ड्यिरा ख्यिराडला काड साड मालाड। बोरु चोवो येशू ख्रीष्टकी लेन ल्यामु ख्याप्टाक कितुपला दुक्पा मेड्शी

सिनी चुका दुक्पा ख्येल्सिनाड हम क्यानी देतिन। १३काड ख्यिराडला छ्या मे? कोन्छ्योककी लहडाड नाड्ला लाका कितुपतिवी लहडाड नेमा राड समा सेवी। लहडाडकी छोटीला शब्ज्यी कितुपतिवी जिन्बा पुलुप नेमा राड थोप गोवु ति थोप्किवी। १४तुक राड क्यानी लेन ल्यामु ख्याप्टाक कितुपतिवा लेन ल्यामु ख्याप्टाक कितुप नेसुर राड मिजी क्योड्शी सिनी कोन्छ्योककी क नड वे।

१५यिने डला थोप गोवु ओड ति डे नाम्साड माछाल। डला थोप गोवुतिवा तेरी गोकिवी सिनी दी यिकी टिवु साड मिन। डे तेके क्यावु ताम्डेला सी साड ग्येकिवी सिसिन बोरु ड शेष राड गा यिन। १६दोजो डे लेन ल्यामु ख्याप्टाक क्यासिनाड काड अम्बारडिशड कितुप ताम्डे मे, च्यिलासिसिन डे लेन ल्यामु ख्याप्टाक माक्यावाला माक्यावी मेवी। ख्याप्टाक माक्यासिन डला कोन्छ्योककी पर्च्या फोकिवी। १७ती सुड ख्याप्टाक कितुप लाका ति डरा राड क्यावु यिन्सियाड डला काड रे च्यिक रे छ्यक्तक थोपुप ति यिन्जा, यिने दी लाका ति कोन्छ्योककी डला चेक तेन नड्गुप तप्की डे क्यावु यिन। १८सुड ख्याप्टाक क्यानी डला काड छ्यक्तक थोप्किवी सिसिन डे लेन ल्यामु ख्याप्टाक क्यासिमा थोपुप ओड ति मोछोलुप ताड डराडला थोप गोवु टड्गा मालावा क्यानी ख्याप्टाक

कितुप ति डला थोप गोवु छ्यक्तक यिन।

१९ड ति सी योक्पु साड मिन, यिने मी बडीला ख्रीष्टकी लेन ल्यामु ख्याप्टाक क्यानी खोला तेपा कि ज्यितुपला मी तेरीकी योक्पु दोके च्युड्यिन। २०यहूदीतिवाला सुड ख्याप्टाक कितुप सिनी ड यहूदी दोके च्युड्यिन। कोन्छ्योककी ठिमकी ओडला देतुपतिवाला सुड ख्याप्टाक कितुप सिनी ड ठिमकी ओडला मेसिनाड वोतुप दोके च्युड्यिन। २१तमा ठिमकी ओडला मेतुपतिवाला ख्रीष्टकी ओडला टि वुड्गुपला ड ति ठिमकी ओडला मेतुप दोके राड च्युड्यिन। डे तुक क्यावु ति ड ति कोन्छ्योककी ठिमला मेतेन सिक्यावु ति मिन, ख्रीष्टकी सुडला ड्येन्दुप यिन। २२तमा तेपा रम्बु मेतुपतिवाला ख्रीष्टला तेपा कि ज्यितुपला ड साड तेपा मेतुपतिवा दोके राड च्युड्यिन। मी ललाइ ललाइला ख्रीष्टला तेपा कि ज्यितुपला ड ति नम्बा तेरीकी मीतिवा दोके राड च्युड्यिन। २३ती दोके क्यानी डे लेन ल्यामु ख्याप्टाक कितुप लाकातिवा तेरी क्यावु तेन्दोक ति मीतिवी येशूला तेपा कितुप मोलाम थोप्शी, तमा ती मोलाम ति डला साड थोप्शी सिनी यिन।

२४काड ख्यिराडला छ्या मे, छ्योड्बाल ग्यकुप चिर्मुला मीतिवा तेरी छ्योड्बाल ग्यकिवी, यिने छ्यक्तक ति मिरा च्यिकला तिराड

थोप्किवी। तुक क्यानी ख्यिराड साड छ्यक्तक थोपुप थोकला छ्योड्बाल ग्योप। २५ चिर्मु चेपला वुङ्गुप मीतिवा तेरी छ्यक्तक थोपुपला डेकला देनी तालिम किवी। तिवा ना डोप छ्यक्तक थोपुपला तुक किवी, यिने दाकपु ति नाम्साड ना मोडोवु छ्यक्तक थोपुपला डेकला देनी तालिम किवी। २६ तुक क्यानी ड साड छ्यक्तक थोपुपला छ्योड्बाल ग्यकुप चिर्मु चेप मीतिवा दोके क्यानी छ्योड्बाल ग्यकिवी। ड ति वोक्तुम ग्यकुप चिर्मु चेप मी तीकी तेर्मला वुर्तुकला वोक्तुम माग्यकुप दोके क्यानी तेन्दोक मेतुप लाका मिकिवी। २७ ड डे जुला छासे दुक्पा वोसिनाड चिर्मु चेपला तालिम कितुप मी दोके क्यानी डेकला देतिन। मिसियाड मी यम्बाला लेन ल्यामु ख्याप्टाक क्यासिमा ड ति छ्यक्तक थोपुपला फम्बुप मी दोके च्युङ्गिगी।

इस्राएलकी लोग्यु नेसुर येन्देन

१० अच्युनुपतिवा, ख्यिराड दी ताम्डे ति नासाम तोड! दाकपी पगावा हङ्गावातिवाला कोन्छ्योककी मिश्र लुड्बा नेसुर तेन्नी वुङ्गुप पेला तिवी गोमा गोमाला मुक्पा तङ्नी लाम छ्या तेन्सुड। तिवा डोप पेला ग्येम्छो साड फेका ड्यी गल्नी तिवा डोप लाम पेतुप यिन।

२ तमा तिवा तेरी मोशाकी सिक्पावु खला ड्येन्नी मुक्पा ताड ग्येम्छो नाड नेसुर युनी बप्तिस्मा च्युड्सुड। ३ ती पेला तिवा तेरीकी कोन्छ्योककी थु चाड्मा नेमा नङ्गुप समा साड च्यिक्पा राड सोवु यिन। ४ तुक राड क्यानी कोन्छ्योककी थु चाड्मा नेमा नङ्गुप छ्यु साड च्यिक्पा राड थुसुड। ती छ्यु ति दासा पाड्थेरीकी लामला डोप पेला मुला राड वोतुप कोन्छ्योककी थु चाड्माकी दो ग्येर्पु नेमा थेन्दुप छ्यु यिन। ती छ्यु थेन्दुप दो ग्येर्पुकी तेन्दोक ति ख्रीष्ट यिन। ५ यिन्सिनाड तिवी कोन्छ्योकला तेपा माक्यावु तप्की तिवा माड्शोककी मुला खो गा माक्या। ती तप्की तिवा कनान लुड्बा मालेपा क्यानी शिनी तिवी रोतिवा दासा पाड्थेरीला थरा थुरा गाल्सुड।

६ तीकी तेन्दोक ति तिवी दोके क्यानी दाकपी साड सेमला मेलोवा कितुप नासाम तोङ्गुप मेवी सिनी दाकपी थोकला येन्देन बिन्दुप यिन। ७ तिवी पर्ला मिरा चोकी क्यावु दोके ख्यिराड साड कुला छ्यो मातोड। कोन्छ्योककी सुडला दुक सिनी टि वे, “मीतिवा साप ताड थुङ्गुपला देसुड, तमा शम्डेन कितुप छाल्सुड।” * ८ तिवी पर्ला मिरा चोकी शम्डेन क्यासुड, यिने दाकपु ति तुक कितुप मेवी। तिवी शम्डेन क्यावु

तप्की डियमा च्यिकला राड मिरा तोड्डा खल ज्यिक ताड सुम शिसुड। ६दाक्पी चोवो ख्रीष्टकी तेन्दोकला लङ्गुप मेडिगवी। तिवी पर्ला मिरा चोकी खोकी तेन्दोकला लावु तप्की रुलकी फेनी शिसुड। १०दाक्पु ति कोन्छ्योककी तेन्दोकला ड्योशोक ड्योशोक सिरुप मेडिगवी। तिवी पर्ला मिरा चोकी ड्योशोक ड्योशोक सिक्यावु तप्की कोन्छ्योककी देवाच्येनकी लेन क्योलुप थुतिवा ताड्नी तिवाला ना तोड च्यिसुड। ११तिवाला तुकै च्युङ्गुप ति दाक्पी थोकला येन्देन तेरुपला यिन। तमा ती ताम्डेतिवा कोन्छ्योककी सुडला टिवु ति दाक्पुला च्याङ्से दे ज्यितुपला यिन। च्यिलासिसिन त याड जम्बुलिड ना डोप तुजे छे वे।

१२तुक क्यानी ख्यिराड तेपा रम्बु वे सिनी सिरुपतिवा च्याङ्से क्यानी देता। मिसियाड ख्यिराड तला ग्यकितो। १३ख्यिरा मिजीला खोकपा लहाप ताम्डेतिवा ख्येलुप पेला ती खोकपा लहाप ताम्डेतिवा ति मी यम्बाला साड ख्येलिगवी सिनी नासाम तोड। कोन्छ्योक ति खोड्तेर्मु वे, खोकी ख्यिराडला ख्यिरा अछ्योवु सिनाड लहक्पा खोकपा लहाप ताम्डेला ख्येल मिज्यिवी। यिने खोकपा लहाप ताम्डे ख्येल वासिनाड ती नेसुर थरुप लाम साड नडिगवी। तुक क्यानी ख्यिराड खोकपा लहापला ख्येलुप पेला हम क्यानी दे थुक्किवी।

कुला पुलुप डेन ताड चोवोकी डेनकी कोर्ला

१४तुक क्यानी डे डियड्ज्येवु अच्युनुपतिवा, ख्यिराड कुला छ्यो तोङ्गुप क्युर। १५ख्यिराड ति मी हाक्कोमु यिन। तुक क्यानी ख्यिराड डे सिक्यावु ताम्डे ति यिन्दे मिन्दे सिनी ल्हो। १६दाक्पु चोवोकी डेन साप पेला दाक्पुला मोलाम नङ्गुप कोरा नेमा थुनी ख्रीष्टकी दाक्पी थोकला तेन्दुप ठक नेसुर दाक्पु खो ताड मुला तम्जी ल्यामु जोवु यिन। तमा शुब्ज्याड च्याकनी साप ति ख्रीष्टकी दाक्पी थोकला टुङ्गुप जु नेसुर दाक्पु खो ताड मुला तम्जी ल्यामु जोवु तेन्दोक यिन। १७दाक्पु बडी वोसिनाड दाक्पी साप शुब्ज्याड ति च्यिक राड वोतुप तप्की दाक्पी जु ति च्यिक राड यिन। च्यिलासिसिन दाक्पु तेरीकी शुब्ज्याड च्यिक नेसुर मुला राड सेवी।

१८इसाएलकी मिरिकतिवाला नासाम तोड। कोन्छ्योककी थोकला जिन्बा पुलुप श साप ति जिन्बा बुलुप मीतिवी मुला दला शुकुप यिन। १९कुला पुलुप समातिवा काड यिन रो? कुतिवा काड यिन रो? २०तिवा काड साड मिन। डे सिक्यावु ताम्डे ति काड यिन सिसिन, कोन्छ्योकला डो माशेवु मीतिवी कुला छ्यो तोङ्गुप ति कोन्छ्योकला मोवा क्यावु मिन, यिने ज्हेन्डीला जिन्बा पुलुप यिन। तुक क्यानी ख्यिरा साड

ज्हेन्डीला जिन्बा बुलुप मीतिवी दला शुकुप ति डला गा मलडिगवी। २१ख्यिराड ति चोवोकी डेन साप पेला वानी चोवोकी कोरा नेमा थुङ्गुप ताड येलुड गल्नी ज्हेन्डीला मोवा कितुपला ज्हेन्डीकी कोरा नेमा थुङ्गुप मेडिगवी। तुक क्यानी चोवोकी डेन सोसिमा येलुड गल्नी ज्हेन्डीकी डेन साप साड मेडिगवी। २२काड ख्यिराड चोवो येशूला डियर्मु लोडिगवी? काड खो दाक्पु सिनाड ओड छ्येवु मे रो?

तेरी कोन्छ्योककी मोवाकी थोक्ला की

२३मी ललाइकी “मीतिवी काड क्यासिनाड गिवी।” सिनी सिवी, यिने ती तेरी ताम्डे ति ख्येप्साड वोतुप ति मिन। तमा “मीतिवी काड क्यासिनाड गिवी।” सिनी सिवी, यिने तेरी ताम्डे ति मी यम्बाला ख्येप्साड मे। २४सी साड खोरो थोक्ला तिराड ख्येप्साड माछोल, यिने मी यम्बी थोक्ला साड ख्येप्साड वुङ्गुप लाका किशी। २५श चोङ्गुप दासाला गल्नी श ड्योप पेला ख्योरो सेम लोदिवुला ती श ति कुला पुलुप यिनाड मिन सिनी काड साड माटिवा क्यानी इयोनी सोवा। तुक क्यासिन ख्योरो सेम ति लो दिकिवी। २६च्यिलासिसिन “जम्बुलिड ताड जम्बुलिडला वोतुप तेरी च्यालकतिवा

कोन्छ्योककी राड जो नङ्गुप यिन।” सिनी कोन्छ्योककी सुडला टि वे।*

२७दोजो कोन्छ्योकला डो माशेवु मी मिरा च्यिककी ख्यिराडला डेनला कतोङ्गुप पेला ख्यिराडला डोप नो वोसिन तिवी बिन्दुप समा ति काड साड माटिवा क्यानी सो। तुक क्यासिन ख्योरो सेम ति लो दिकिवी। २८यिने ललाइकी दी याड कुला पुलुप समा यिन सिक्यासिन तुक सिरुप मी तीकी थोक्ला ताड तीकी सेम ज्योकुपला ती पुलुप समा ति मासा। २९डे तुक सिक्यावु ति ख्योरो थोक्ला मिन, यिने ख्युरुडला दी ति कुला पुलुप समा यिन सिरुप मी तीकी सेम ज्योकुपला सिक्यावु यिन। तुक क्यासिन ड ति मी यम्बी सेम ज्योकुपला च्यिला डला गा लङ्गुप लाका कि मुथुपी? ३०दोजो डे कोन्छ्योकला थुचिछे पुलनी समा सोसिन ती समा सोवु तप्की मीतिवी डला च्यिला मेलोक्पा जोप्जा?

३१तुक क्यानी ख्यिराड सोसिनाड थुसिनाड काड क्यासिनाड ती तेरी कोन्छ्योककी मोवाकी थोक्ला किसा। ३२यिने यहूदीतिवाला ताड ग्रीककी मीतिवाला ताड कोन्छ्योकला तेपा कितुप चर्चकी मीतिवा सुला साड दुक्पा ख्येलुप लाका ति माकिसा। ३३तुक राड क्यानी डे साड काड क्यासिनाड मी तेरीला सेम गा लोङ्गुप नो क्यायी।

ड डरा थोकला तिराड मिन, यिने मी तेरीला ल्यामु च्युङ्शी सिरुप नो कितिन। तुक क्यानी ती मीतिवा साड दिक्पा ने थर्शी।

११ डे ख्रीष्टकी लुमु सेतुप दोके ख्यिराड साड डे लुमु से।

पुम्पेजातिवी गो उपुप कोर्ला

२ख्यिरा डला नरी टेन्दुप ताड डे लापुप येन्देनला ड्येन्दुप तप्की ड ख्यिरा थोकला छासे गा लान वे। ३यिने दी ताम्डे ति ख्यिरा हाक्कोशी सिरुप ति डला नोवा वे। तेरी मीतिवा सिनाड छ्ये ति येशू ख्रीष्ट यिन। तमा पेर्मी सिनाड छ्ये ति तीकी ख्योवा यिन। तमा ख्रीष्ट सिनाड छ्ये ति कोन्छ्योक यिन। ४ख्योकपेजाकी मोपोर कितुप पेला ताड नम्रदर शेतुप पेला खोरो गो उपुप ति ख्रीष्टला मारे तोङ्गुप यिन। ५यिने पुम्पेजाकी गो माउप्नी मोपोर कितुप ताड नम्रदर शेतुप ति ख्योवी थोकला मारे तोङ्गुप यिन। च्यिलासिसिन ती ति तीकी खोरो गोकी ज्ह टेवु दोके यिन। ६दोजो ललाइ पुम्पेजातिवी खोरो गो माउपा क्यानी मोपोर किसिन तीकी खोरो ज्ह टेक्शी। यिने ज्ह टेकुपकी पुम्पेजाकी थोकला डोछा लङ्गुप ताम्डे यिन्सियाड तीकी मोपोर कितुप पेला खोरो गो उप्शी।

७ख्योकपेजी मोपोर कितुप पेला खोरो गो उपुप मेङ्गिगी, च्यिलासिसिन ख्योकपेजा ति कोन्छ्योककी जुजमला राड जोवु ताड खोकी मोवा

छ्या देन्दुप यिन। यिने पुम्पेजा ति ख्योकपेजी मोवा यिन। ८च्यिलासिसिन कोन्छ्योककी मीला जो नङ्गुप पेला पुम्पेजा नेमा ख्योकपेजा जोवु मिन, ख्योकपेजा नेमा पुम्पेजा जोवु यिन। ९तमा पुम्पेजी थोकला ख्योकपेजा जोवु मिन, यिने ख्योकपेजी थोकला पुम्पेजा जोवु यिन। १०तुक क्यानी देवाच्येनकी लेन क्योलुप थुतिवी थोङ्दाडला रङ्गी ख्योवी ओडला देन वे सिरुप छ्या देन्दुपला पुम्पेजातिवी खोरो गो उप गोकिवी। ११यिन्सिनाड चोवोकी थोङ्दाडला ति ख्योकपेजाला पुम्पेजा मेसिन मेवी, पुम्पेजाला साड ख्योकपेजा मेसिन मेवी। १२च्यिलासिसिन कोन्छ्योककी ख्योकपेजा नेसुर पुम्पेजा जोवु दोके पुम्पेजी खोक नेमा ख्योकपेजा क्येवी। तिवा तेरी कोन्छ्योककी जो नङ्गुप यिन।

१३तुक क्यानी ख्यिराड नासाम तोड। पुम्पेजी गो माउपा क्यानी मोपोर कितुप ति पोमु गिगी रो? १४वुतुड के कोन्छ्योककी ज्येवु दी जम्बुलिङकी च्यालकतिवाला ल्हासिन हाक्कोकिवी। ख्योकपेजी ज्ह रिङ्बु सासिन ती ति डोछा यिन सिरुप ति दाक्पुला छ्या वे। १५यिने पुम्पेजी ज्ह रिङ्बु वोतुप ति तिवी थोकला मोवा वोतुप यिन। च्यिलासिसिन पुम्पेजी ज्ह रिङ्बु ति तिवी गो उपुपला कोन्छ्योककी जो नङ्गुप यिन। १६दोजो ललाइकी दी ताम्डेला

केवुल कितुप नो किवी सिसिन दुका
ताम्डेतिवा ड्यिराड ड्याम मिकिवी,
च्यिलासिसिन दुका ताम्डेतिवा
ड्यिराड ताड कोन्छ्योककी चर्च
तेरीकी लुकसुला मे।

चोवोकी डेन साप कोर्ला

(मत्ती २६:२६-२८; मर्कूस १४:२२-२५;

लूका २२:१४-२०)

१७ त डे ख्यिराडला सिरुप ताम्डेकी
कोर्ला ति ख्यिरा ल्यामु क्यावु यिन
सिनी सिरुप ति डला गा मलाडिगवी।
च्यिलासिसिन ख्यिराड कोन्छ्योकला
सोवा देकुपला चर्चला जोम्बुप ति
ल्यामु मिन, मेलोकपा गाल्सुड।
१८ ख्यिराड चर्चला जोम्बुप पेला
गोमाला के ख्यिरा पर्ला ख्ये पेनोक
सिरुप ति डे थोसुड। ती ताम्डे ति
टेके साड यिन। १९ ख्यिरा पर्ला
कोन्छ्योककी थोड्दाडला मी टेड्बु
मेटेड्बु सु यिन सिरुप ति हाक्कोवुला
तुका ताम्डेतिवा वुड राड गोकिवी।
२० ख्यिराड मुला राड जोम्बुप पेला
चोवोकी डेन सोवु ति वुतुड के चोवोकी
डेन सोवु मिन, २१ च्यिलासिसिन
मीतिवा यम्बाला मागुवा क्यानी दाक
दाक्पी समा सेवी। तुक राड क्यानी
ललाइ मीतिवा ति ल्होतुड्बा राड
लुकिवी। तमा ललाइ ति छ्याडकी
जिनी गिवी। २२ साप ताड थुङ्गुपला
ख्यिरा ति दाक दाक्पी खाड्बा मे
रो? याड्ना ख्यिराड कोन्छ्योककी
चर्चला मारे तोङ्गुप ताड काड साड

मेतुपतिवाला डोछा लोडिगवी? दीकी
कोर्ला काड सिरुपजा? काड ड ख्यिरा
थोकला चिताड कितुप? वुतुड के ड
दुका ताम्डेला चिताड मिकी।

२३ दी डे बिन्दुप येन्देन ति चोवो येसू
नेमा राड डला थोपुप यिन। खो डकी
लकला जिम्बुप नुपला खोकी शुब्ज्याड
लकला लासुड। २४ तमा कोन्छ्योकला
थुचिछे पुलिसमा ती शुब्ज्याड ति
च्याकनी दुक सुड्सुड, “दी ति ख्यिरा
थोकला बिन्दुप डे जु यिन। ख्यिराड
डला टेन्दुपला दी ति किसान।” २५ तुक
राड क्यानी खोकी कोरा लकला लानी
दुक सिनी सुड्सुड, “दी ति डे ठक
नेसुर कोन्छ्योककी थाक्छ्येन नड्गुप
ठिम सम्बा यिन। नम पेला ख्यिरा दी
कोरा नेमा थुडिगवे, ती पेला डला
टेन्दा किसान।” २६ तुक क्यानी चो पेला
ख्यिरा दी शुब्ज्याड साप ताड दी कोरा
नेमा थुडिगवे, खो माफेवा सेक ख्यिरा
चोवो दुङ्गुप कोर्ला ख्याप्टाक किसान।

२७ यिने सी ल्यामो हाक्माकोवा
क्यानी दी शुब्ज्याड साप ताड चोवोकी
कोरा नेमा थुडिगवे, तीकी चोवोकी जु
ताड ठकला मेचेड्गा जोवु तप्की तीकी
दिकपा क्यावु यिन। २८ तुक क्यानी तेरी
मीतिवी गोमाला खुरुड कोन्छ्योक
ताड मुला तम्जी ल्यामु वोतुप मेतुप
नासाम तोड्शी, तमा तिराड चोवोला
टेन्दुप शुब्ज्याड साप ताड कोरा नेमा
थुड्शी। २९ च्यिलासिसिन दोजो सी
शुब्ज्याड ताड कोरा ति खोकी जु ताड
ठक यिन सिनी ल्यामु हाक्माकोवा

क्यानी साप ताड थुङ्गिगे, तीला पचर्या फोकिवी। ३० तुकै यिन्दुप तप्की ख्यिरा पर्ला ललाइ ति जुला रम्बु मेतुप ताड काड साड कि मुथुपुप ताड ललाइ ति नेर्पु गल वे। तमा मिरा चो ति शिसुड। ३१ यिने दोजो चोवोकी डेन साप सिनाड गोमाला खोरो मिजी चुकै वे सिरुप ति हाक्कोसिमा दाक्पु खोकी पचर्याला मेख्येल्वी। ३२ दाक्पु ति जम्बुलिङकी मीतिवी मुला राड ना मोडोशी सिनी कोन्छ्योककी दाक्पुला ठिम क्या नङ्गिगी, तमा छेटाड साड तेर्किवी। ३३ तुक क्यानी अच्युनुपतिवा, ख्यिराड मुला राड जोम्नी चोवोकी डेन साप पेला च्यिककी च्यिकला गुसा। ३४ दोजो ललाइ ल्होतुङ्बा वोसिन तीकी खोरो खाड्बाला राड सशी। मिसियाड मुला राड जोम्नी चोवोकी डेन साप पेला ख्यिराडला साड पचर्या फोकिवी। यम्बा ताम्डेतिवा ति ड वासिमा सिरुप्नो।

कटिनकी ड्येम्बाकी कोर्ला

१२ अच्युनुपतिवा, कोन्छ्योककी थु चाड्मा नेमा थोपुप कटिनकी ड्येम्बाकी कोर्ला ख्यिराडला टेङ्बो क्यानी हाक्कोशी सिनी ड दी ताम्डे ति सिरिन। १ ख्यिराड कोन्छ्योकला डो माशेवु पेला ताम्डे लप मुथुपुप कुतिवाला सोवा देकुपला तिवी थाकाला गलुप ति ख्यिराडला छ्या वे। २ तुक क्यानी ख्यिरा दी ताम्डे ति हाक्कोवा की। कोन्छ्योककी थु

चाड्मा नेमा ताम्डे कितुप सी साड “येशूला मोताप सुकुप यिन।” सिनी सि मुथुपी। तमा खोकी थु चाड्मा नेमा तिराड मिसिन यम्बा सी साड “येशू ति चोवो यिन।” सिनी सि मुथुपी।

४ कोन्छ्योककी थु चाड्मा नेमा थोपुप कटिनकी ड्येम्बा ति कुतुक कुतुक गिवी, यिने ती कटिनकी ड्येम्बा नङ्गुप खोकी थु चाड्मा ति च्यिक राड यिन। ५ शब्ज्यी कितुप लाकातिवा नम्बा कुतुक कुतुक गिवी, यिने चोवो येशूला शब्ज्यी कितुप ति च्यिकपा राड यिन। ६ कोन्छ्योककी थोक्ला कितुप लाकातिवा कुतुक कुतुक गिवी, यिने दाक्पुला ती तेरी लाका कितुपला कटिनकी ड्येम्बा नङ्गुप ति कोन्छ्योक राड यिन।

७ कोन्छ्योककी थु चाड्माकी मी रे रेला लाका कितुप खोकी कटिनकी ड्येम्बा नङ्गुप ति खोरो थोक्ला तिराड मिन, मी तेरीला ल्यामु च्युङ्गी सिनी नङ्गुप यिन। ८ कोन्छ्योककी थु चाड्मा नेसुर राड ललाइ मीतिवाला रिक्पा तेरुप ताम्डे लपुप ताड ललाइला ति येन्देन तेरुप ताम्डे लपुप ताड ९ ललाइला ति कोन्छ्योककी थु चाड्मा नेमा राड तेपा कितुप ताड ललाइला ति नेजु टेक ज्यितुप कटिनकी ड्येम्बा नङ्नी वे। १० तमा ललाइला ति हलेवु लाका छ्या देन्दुप ताड ललाइला ति नम्दर शेतुप ताड ललाइला ति मीतिवी लापुप सुड ति खोकी थु चाड्मा नेमा यिन्दुप मिन्दुप

हाक्को ज्यितुप कटिनकी ड्येम्बा नङ्नी वे। तमा ललाइला ति ग्येताम कुतुक कुतुक लपुप ताड ललाइला ति ती ग्येताम ति छिक ग्युरुप कटिनकी ड्येम्बा नङ वे। ११ यिने तेरी लाका कितुप ति कोन्छ्योककी थु चाड्मा नेमा थोपुप यिन। ती कटिनकी ड्येम्बातिवा ति खोकी नोवाला वोतुपतिवा तेरीला नङ्गिगी।

जु च्यिकला येन्लकतिवा बडी वे

१२ मी जु ति च्यिक राड वोसिनाड ती जुला लाक्पा काड्बा ताड यम्बा येन्लकतिवा बडी वे। तमा येन्लकतिवा बडी वोसिनाड जु ति च्यिक राड वे। ती दोके ख्रीष्टला तेपा कितुपतिवा बडी वोसिनाड ख्रीष्ट ति च्यिक राड ज्यु वे। १३ च्यिलासिसिन दाक्पु यहूदीतिवा यिन्सिनाड ग्रीकतिवा यिन्सिनाड योक्पुतिवा यिन्सिनाड योक्पुतिवा मिन्सिनाड कोन्छ्योककी थु चाड्मा च्यिककी ओडला राड दाक्पी बप्तिस्मा लानी जु च्यिक राड च्युङ्गुप यिन। तमा दाक्पु तेरीला खोकी थु चाड्मा साड च्यिक राड नङ्नी वे।

१४ तुक राड क्यानी दाक्पी जुला येन्लक च्यिक राड वोतुप मिन, यिने येन्लकतिवा बडी वे। १५ दोजो काड्बी “ड लाक्पा मिन, तुक क्यानी ड ति जुकी येन्लक मिन।” सिक्यासिन काड्बा ति जुकी येन्लक मिन रो? १६ येल्ड दोजो नम्ज्योककी “ड

मिक मिन, तुक क्यानी ड ति जुकी येन्लक मिन।” सिक्यासिन नम्ज्योक ति जुकी येन्लक मिन रो? १७ दोजो तेरी जु ति मिक यिन्दुप यिन्सियाड तीकी कनी नेसुर थो थुष्किवी रो? दोजो तेरी जु ती नम्ज्योक यिन्दुप यिन्सिन तीकी चुक क्यानी टेमा नोप्जा? १८ यिने कोन्छ्योककी खोरे नोवाकी राड जुकी तेरी येन्लकतिवा दाक दाक्पी दासाला थिनी जोन नङ वे। १९ दोजो येन्लक च्यिक तिराड तेरी जु यिन्दुप यिन्सिन, जु ति वुड मुथुपी। २० तुक क्यानी जुला येन्लकतिवा बडी वोसिनाड जु ति च्यिक राड यिन।

२१ मिक तीकी लाक्पाला “ख्युरुड डला मोगोवी।” सिनी सि मुथुपी। तमा गो तीकी काड्बाला “ख्युरुड डला मोगोवी।” सिनी सि मुथुपी। २२ बोरु जुला वोतुप यम्बा येन्लक सिनाड रम्बु मेतुप येन्लक ति दाक्पी जुला मड मेताला मेती मेवी। २३ तमा जुला वोतुप चुका येन्लक ति खक्छ्ये मेवे, तीला राड दाक्पी मड ड्याम किवी। तमा पाड्ला छ्या देन्दुप मेवु येन्लकतिवाला दाक्पी ल्यामु क्यानी ल्हटे किवी। २४ यिन्सिनाड मिककी थोड्दाडला ल्यामु वोतुप येन्लकतिवाला दाक्पी वोजिमु कि मोगोवी। तुक क्यानी कोन्छ्योककी दाक्पी जुकी रम्बु मेतुप येन्लकतिवाला मड ड्याम कितुप जोनी डिक्नी ज्याड वे। २५ तुक क्यानी जु ति ख्ये मेपेवी, तमा जुकी येन्लकतिवा तेरी

डिकनी च्यिककी च्यिकला ल्यामो क्यानी ल्हटे किवी। २६दोजो जुकी येन्लक च्यिकला दुक्पा ख्येल्सिन यम्बा तेरी येन्लकतिवी साड दुक्पा खुर गोकिवी। तमा येन्लक च्यिकला ताड्देन च्युडिसन यम्बा येन्लकतिवा तेरीला गा लडिगवी।

२७ख्यिराड तेरी ख्रीष्टकी जु यिन, तमा खोकी जुकी येन्लकतिवा रे रे यिन। २८कोन्छ्योककी चर्चला गोमा कितुप मीतिवा पेन नड वे। तिवा ति गोमाला लोमा छ्येतिवा यिन, तमा डियवा ति नम्दर शेतुपतिवा यिन, तमा सुम्बा ति गेकेनतिवा यिन, तमा ती ज्युक्ला हलेवु लाका छ्या देन्दुपतिवा ताड नेर्पु टेक ज्यितुपतिवा ताड दाल्जा किटे कितुपतिवा ताड चर्चला ओड्ज्येन कितुपतिवा ताड ग्येताम कुतुक लपुपतिवा यिन। २९यिन्सिनाड तिवा तेरी लोमा छ्येतिवा यिन रो? काड तिवा तेरी कोन्छ्योककी लुड्तेम्बातिवा यिन रो? काड तिवा तेरी गेकेनतिवा ताड हलेवु लाका छ्या देन्दुपतिवा यिन रो? ३०याड्ना काड तिवा तेरीकी मुला नेर्पु टेक ज्यितुप ओड वे रो? काड तिवा तेरीकी ग्येताम कुतुक कुतुक लप्किवी रो? काड तिवा तेरीकी ग्येताम कुतुक कुतुककी छिक ग्युरुप थुप्किवी रो? ३१यिने ख्यिराड ति कोन्छ्योककी थु चाड्मा नेमा थोपुप छासे कटिनकी ड्येम्बा ड्येतुपला रेवा किसा।

तमा ड ख्यिराडला ती सिनाड मड खक्छ्येवु लाम ल्यामु छ्या देनिनो।

डियड्ज्ये कितुप कोर्ला

१३ दोजो डे मीतिवी तेरी ग्येतामला ताड देवाच्येनकी लेन क्योलुप थुतिवी ग्येतामला लाप्सिनाड डे सेमला ति डियड्ज्ये मेसिन ड ति ठिड ठिड सिरुप टिलुक ताड ज्याड ज्याड सिरुप बुक्शल दोके तिराड यिन। २डे मुला नम्दर शेतुप कटिनकी ड्येम्बा साड वे, तमा डे मुला सुला साड हाक्मोकोवु छ्याकला वोतुप ताम्डे हाक्कोवु ताड तेरी येन्देन शेकिवी, तमा रीतिवा साड दोक थुपुप तेपा ति डला वोसिनाड डे सेमला ति डियड्ज्ये मेसिन ड ति काड साड मिन। ३दोजो डे मुला वोतुप नोर टोड्बातिवा तेरी पेराड्बुतिवाला गोनी बिनिन, तमा मीतिवाला छ्या देन्दुपला डे जु तिरुड मेला ज्हेकुपला बिन्सिनाड डे सेमला डियड्ज्ये मेसिन डला काड साड ख्येप्साड मेडिगवी।

४सेमला डियड्ज्ये वोतुप मी ति हम क्यानी दे थुप्किवी, मी यम्बाला साड च्यम्बा किवी, ठतोक मिकिवी, तेके मिकिवी, छ्येजु साड मिकिवी। ५तमा सेमला डियड्ज्ये वोतुप मी तीकी ताड्देन मेतुप किताड नालु मेलोवा मिकिवी, खुरुडला तिराड नासाम मोतोडिगवी, डियर्मु मिकिवी, मी यम्बी खुरुडला मेलोवा क्यावु ति नासाम मोतोडिगवी। ६सेमला

ड्रियङ्ज्ये वोतुप तीकी दुक्टा कितुपला गा मिक्किवी, यिने ताम्डे टेङ्बुला तिराड गा किवी। ७सेमला ड्रियङ्ज्ये वोतुप मी तीकी तेरी ताम्डेला छेटाड वोसिनाड हम क्यानी देकिवी, तेरी ताम्डेला तेपा किवी, तेरी ताम्डेला रेवा किवी, तमा नरी ताम्डेला डेकला देकिवी।

८नम्रर शेतुप ताम्डेतिवा तोर्नी डिवी, ग्येतामतिवा साड तोर्नी डिवी, येन्देनतिवा साड तोर्नी डिवी, यिने ड्रियङ्ज्ये कितुप ति नाम्साड तोर्नी मोडोवी। ९तन्दा ति कोन्छ्योककी चुक क्यानी लाका क्या नडिगवी सिरुप ति दाक्पुला तेरी हाक्मोकोवी, दाक्पी नम्रर शेतुप ताम्डे साड तेरी मेछेवी। १०यिने कोन्छ्योककी तेरी ताम्डेतिवा हाक्कोवु तुजे लेप्सिमा दाक्पी हाक्माकोवु ताम्डेतिवा तेरी हाक्कोकिवी। ११ड आडा टिक्पे वोतुप पेला आडा टिक्पेकी दोके राड ताम्डे लप्किवी, हाक्कोवु साड आडा टिक्पेकी दोके हाक्कोकिवी, नासाम साड आडा टिक्पेकी दोके तोडिगवी। यिने ड नाज्युड गल्सिमा आडा टिक्पेकी दोके किताड नालुतिवा तेरी क्युरिन। १२तन्दा ति दाक्पी कोन्छ्योकला छल्नी ल्हासिनाड ल्यामो क्यानी मोथोडिगवी, यिने ज्युक्ला ति दाक्पी कोन्छ्योकला ठछ्येली थोड थुक्किवी। तन्दा डे चेयी तिराड हाक्कोकिवी, यिने तुजे छेसिमा कोन्छ्योककी डे थोक्ला तेरी

ताम्डे ठछ्येली हाक्कोवु दोके डे साड तेरी ल्यामो क्यानी हाक्कोकिवी।

१३तुक क्यानी तेपा कितुप ताड रेवा कितुप ताड ड्रियङ्ज्ये कितुप दी सुमतिवा ति नरी लुकिवी, यिन्सिनाड दिवा सुमकी पर्ला खक्छ्येवु ति ड्रियङ्ज्ये कितुप राड यिन।

नम्रर शेतुप ताड ग्येतामतिवा लपुप कोर्ला

१४ तुक क्यानी ख्यिराड तेरी सिनाड गोमाला ड्रियङ्ज्ये कितुप तिराड नासाम तोड। तमा कोन्छ्योककी थु चाड्मा नेमा नड्गुप कटिनकी ड्येम्बा थोपुपला छासे नो की। तमा खक्छ्येवुला ति कोन्छ्योककी नड्गुप नम्रर शेतुप कटिनकी ड्येम्बा थोपुप नो की। १च्यिलासिसिन सी ग्येताम कुतुकला ताम्डे लप्किवे, तीकी मीला ताम्डे कितुप मिन, यिने कोन्छ्योककी मुला ताम्डे क्यावु यिन। तमा तीकी क्यावु ताम्डे ति सी साड हाक्मोकोवी। च्यिलासिसिन तीकी कोन्छ्योककी थु चाड्मा नेसुर छ्याकला वोतुप ताम्डेतिवा लप्किवी। ३यिने नम्रर शेतुप तीकी मी ताड मुला राड ताम्डे किवी। तमा तीकी मीतिवाला मड तेपा रम्बु जोपला दाल्जा कितुप ताड टोड्गु तेरुप ताड लोदिमु तेर्किवी। ४ग्येताम कुतुक कुतुकला ताम्डे कितुप तीकी खुरुडला मड तेपा रम्बु जोपला दाल्जा किवी, यिने नम्रर

शेतुप तीकी चर्चकी मीतिवाला तेपा रम्बु जोपला दाल्जा किवी। ५ख्यिराड तेरीकी ग्येताम कुतुक कुतुकला ताम्डे किशी सिरुप ति डे नोवा वे, यिने ती सिनाड मड खक्छ्येवु ति ख्यिराड कोन्छ्योककी नङ्गुप नम्र शेतुप ति डला नोवा वे। दोजो ग्येताम कुतुक कुतुकला ताम्डे लपुप पेला ती ताम्डे छिक ग्युरुप मी साड वोसिन तीकी चर्चकी मीतिवाला मड ल्यामु किवी। मिसियाड हाक्मोकोवु ग्येताम कुतुक कुतुकला ताम्डे लपुप सिनाड नम्र शेतुप ति छ्ये यिन।

६अच्युनपतिवा, दोजो ड ख्यिरा ते वानी ग्येताम कुतुक कुतुकला ताम्डे क्यायी, यिने डे ख्यिरा पर्ला कोन्छ्योककी छ्या तेन नङ्गुप ताम्डे लपुप ताड रिक्पा तेरुप ताड नम्र शेतुप येन्देनतिवा ख्यिरा हाक्कोवु ताम्डेला सि माक्यासिन ख्यिराडला काड साड ख्येप्साड मेवी। ७ती दोके लुमु पुवु ताड पिवाड टिलुप पेला दा ल्यामु माथेन्सुड सिसिन मीतिवी चुक क्यानी लुमु पुवु ताड पिवाड टिलुप वोरु यिन सिनी हाक्कोवुजा? ८येलुड बिगुल पुतुप मक्मी तीकी बिगुलकी दा ल्यामु मातेन्सुड सिसिन चुक क्यानी यम्बा मक्मीतिवा मक ग्यक डोपला टडिक कितुप्जा? ९तुक राड क्यानी ख्यिरा लापुप ग्येताम कुतुक कुतुककी ताम्डे ति मीतिवी ल्यामु हाक्माकोसिन चुक क्यानी मीतिवी ख्यिरा लापुप ताम्डे ति हाक्कोवुजा? ती ति तेन्दोक

मेतुप डिवी। १०दी जम्बुलिडला ग्येतामतिवा नम्बा बडी वोसिनाड तेरी ग्येतामतिवा च्यिक साड तेन्दोक मेतुप मे। ११दोजो मी यम्बी लापुप ताम्डेकी तेन्दोक ति डे हाक्माकोसुड सिसिन ड ति तीकी थोकला छियग्यपकी मी दोके डिवी। तमा ती ताम्डे लपुप मी ति डे थोकला छियग्यपकी मी दोके डिवी। १२तुक राड क्यानी ख्यिराड साड कोन्छ्योककी थु चाड्माकी नङ्गुप कटिनकी ड्येम्बा थोपुप नो क्यावु तप्की तेरी सिनाड गोमाला ख्यिराड कोन्छ्योककी थु चाड्माकी नङ्गुप कटिनकी ड्येम्बा थोप्नी चर्च येके तोङ्गुपला टेमु किसा।

१३तुक क्यानी ग्येताम कुतुक कुतुकला ताम्डे कितुपतिवी ती ग्येतामकी तेन्दोक ति छिक ग्युरुप कटिनकी ड्येम्बा थोपुपला मोपोर की। १४च्यिलासिसिन डे ग्येताम कुतुक कुतुकला मोपोर कितुप पेला डे कोन्छ्योककी थु चाड्मा नेमा मोपोर किवी, यिने ती मोपोर क्यावु तेन्दोक काड यिन सिरुप ति डे सेमला हाक्मोकोवी। १५त तीकी कोर्ला डे काड कि गोकिवी? ड मोपोर कितुप पेला डे कोन्छ्योककी थु चाड्मा नेमा मोपोर कितिन, तमा सेम नेमा साड मोपोर कितिन। कोन्छ्योककी थु चाड्मा नेमा सोवा देकिन, तमा सेम नेमा साड सोवा देकिन। १६मिसियाड ख्योरो कोन्छ्योककी थु चाड्मा नेमा खोला सोवा देकुप पेला यम्बा

मीतिवी हाक्मोकोवी। तुक क्यासिन ख्योरो खोला थुचिछे सिनी मोपोर क्या सिन्सिमा चुक क्यानी तिवी “आमिन” सिरुप्जा? १७ख्योरो याड कोन्छ्योकला ल्यामु क्यानी थुचिछे बुल्गिवी, यिने मी यम्बातिवाला ति तेपा रम्बु जोपला काड साड दाल्जा कि मुथुपी।

१८ड कोन्छ्योकला थुचिछे बुलिन, च्यिलासिसिन ख्यिराड सिनाड ड मड ग्येताम कुतुक कुतुकला ताम्डे किवी। १९यिन्सिनाड चर्चला जोम्बुप मीतिवाला हाक्मोकोवु ग्येताम कुतुक कुतुकला ताम्डे तोड्डा च्यिथम्बा लपुप सिनाड मीतिवाला येन्देन तेरुपला तेरीकी हाक्कोवु ताम्डे छिक च्यिक ड्यी तिराड लपुप ति डे थोक्ला मड ल्यामु यिन।

२०अच्युनुपतिवा, ख्यिराड आडा टिकपेतिवी दोके नासाम मातोड। दुक्टाकी थोक्ला ति आडा टिकपेकी दोके किसा, यिने नासाम ति मी छ्येकी दोके वुड गोकितो। २१कोन्छ्योककी सुडला दुक सिन टि वे,

“ड मीतिवी हाक्मोकोवु
ग्येताम कुतुक कुतुकला
छ्यिग्यपकी मीतिवी ख
नेमा दी मीतिवी मुला ताम्डे
कितिन,
यिन्सिनाड तिवी डे ताम्डे ति
मेड्येन्वी।”*

२२तुक क्यानी ग्येताम कुतुक कुतुकला ताम्डे कितुप ति कोन्छ्योकला तेपा कितुपतिवी थोक्ला मिन, तेपा मिकिवुतिवी थोक्ला त यिन। यिने नम्दर शेतुप ति तेपा मिकिवु मीतिवी थोक्ला मिन, तेपा कितुप मीतिवी थोक्ला त यिन।

२३दोजो चर्चकी मीतिवा तेरी जोम्नी सी साड हाक्मोकोवु ग्येताम कुतुक कुतुकला ताम्डे कितुप पेला ललाइ तेपा मिकिवु मीतिवा याड्डना ताम्डे हाक्मोकोवु मीतिवा ते वासिन तिवी चर्चकी मीतिवाला ड्येन्बु मिसिरी रो? २४यिने तेरी मीतिवी नम्दर शेतिन वोतुप पेला ललाइ तेपा मिकिवु मीतिवा याड्डना ताम्डे हाक्मोकोवु मीतिवा ते वासिन, तिवी नम्दर शेतुप नेसुर खोप्रे दिक्पा क्यावु ति हाक्कोनी खुरुड ति दिक्छेन यिनोक सिरुप ति हाक्कोकिवी। २५तमा तीकी खोरो सेमला वोतुप छ्याकला ज्यकुप ताम्डेतिवा हाक्कोनी ती ति खवुतुडमा देनी कोन्छ्योकला सोवा देकिवी, तमा “वुतुड के कोन्छ्योक ख्यिरा पर्ला वे।” सिरुप ति ख्याप्टाक किवी।

ल्यामु क्यानी सोवा देकुप कोर्ला

२६अच्युनुपतिवा, त ड्यिराड काड सिरुप्जा? ख्यिराड तेरी मुला जोम्बुप पेला ख्यिरा मुला कोन्छ्योकला सोवा देकुप लु लड्गुप ताड येन्देन तेरुप

ताड कोन्छ्योककी छ्या तेन नङ्गुप ताम्डे लपुप ताड ग्येताम कुतुक कुतुक लपुप ताड तीकी तेन्दोक छिक ग्युरुप मीतिवा वे। तिवा तेरी चर्चकी मीतिवाला तेपा रम्बु जोपकी थोकला किशी। २७ ललाइकी ग्येताम कुतुक कुतुकला ताम्डे कितुप पेला मिरा इयी याङ्ना मिरा सुम चोयीकी पाला क्यानी ताम्डे किशी। तमा तीकी तेन्दोक ति छिक ग्युरुप साड किशी। २८ यिने ते चर्चला ग्येताम कुतुक कुतुकला ताम्डे क्यावु ति छिक ग्युरुप मी सु साड मेसिन ती ग्येताम कुतुक कुतुकला ताम्डे कितुप ति खरक्पा देशी। तमा तीकी खुरुड ताड कोन्छ्योकला तिराड ताम्डे किशी। २९ नमदर शेतुप पेला मिरा इयी सुम चोयीकी तिराड नमदर शेतुप ताम्डे लप्शी। तमा इयेन्दुप मीतिवा तिवा सिक्पावु ताम्डे ति टेके यिनोक मिनोक सिनी ल्यामु क्यानी ल्हाशी। ३० यिने ती पर्ला ते वोतुप मी यम्बी नमदर शेतुप सिसिन गोमाला नमदर शेतुप ति खरक्पा देशी। ३१ तुक क्यानी ख्यिराड तेरीकी पाला पाला क्यानी नमदर शे थुप्किवी। तमा इयेन्दुपतिवा साड तेरीकी तीकी कोर्ला लोप थुपुप ताड टोङ्गु साड इयेकिवी। ३२ तमा नमदर शेतुप मी तीकी खोरुड राड डेकला दे गोकिवी। ३३ च्यिलासिसिन कोन्छ्योक ति थरा थुरा वोतुप कोन्छ्योक मिन, यिने लोदिमु नङ्गुप कोन्छ्योक यिन।

कोन्छ्योकला तेपा कितुपतिवा चर्चला जोम्बुप पेला ३४ पुम्पेजातिवा ति खरक्पा देशी। तिवाला काड साड सि माज्यी, यिने कोन्छ्योककी नङ्गुप ठिमला सिक्पावु दोके तिवा चर्चकी ओङ्गला देशी। ३५ दोजो तिवा काड रे च्यिक रे टि गोवु ताम्डे वोसिन खाङ्गु गल्नी दाक दाक्पी ख्योवाला टिशी। च्यिलासिसिन चर्चला पुम्पेजातिवा ताम्डे लपुप ति डोछा यिन।

३६ काड कोन्छ्योककी सुड ति ख्यिराड कोरिन्थकी चर्चकी मीतिवा पर नेमा गो चुवु यिन रो? खोकी सुड ति ख्यिरा पर्ला तिराड वावु यिन रो? ३७ सी साड खुरुड ति कोन्छ्योककी लुङ्गतेम्बा याङ्ना कोन्छ्योककी थु चाङ्मा थोपुप मी यिन सिनी नोकिवी सिसिन तीकी डे टिवु ताम्डे ति चोवो येशूकी क यिन सिनी सेमला लङ्गी। ३८ यिने सी दी ताम्डेला मेङ्गेन्वे, तीकी सिक्पावु ताम्डेला साड माङ्गेन।

३९ तुक क्यानी अच्युनुपतिवा, नमदर शेतुपला छासे नो की। तमा ग्येताम कुतुक कुतुकला ताम्डे माकी सिनी माग्यक। ४० यिने तेरी लाकातिवा डिक्नी छे क्यानी किसा।

ख्रीष्ट टुङ्गी डोसु लावु कोर्ला

१५ अच्युनुपतिवा, डे ख्यिराडला ख्याप्टाक क्यावु लेन ल्यामु ति ख्यिराडला येलुड सिरिन। ख्यिराड ती सुड ति सेमला लानी तेपा रम्बु च्युङ्गी देन वे। २ ख्यिरा डे ख्याप्टाक

क्यावु लेन ल्यामुकी सुडला तेपा क्यासिन ख्यिराड दिक्पा ने थर्किवी, यिने तेपा रम्बु क्यानी मादेसुड सिंसिन ख्यिरा क्यावु तेपा ति तेर्मेला डिवी।

३डला थोपुप तेरी सिनाड खक्छ्येवु सुड ति डे ख्यिराडला ख्याप्टाक क्यावु यिन। ती सुडगी तेन्दोक ति कोन्छ्योककी सुडला सुङ्गुप दोके ख्रीष्ट दाक्पी दिक्पी थोक्ला टुङ्गुप यिन। ४तमा खोकी फुङ्बु कल्दोक क्यासुड, यिने कोन्छ्योककी सुडला सुङ्गुप दोके खो टुङ्गिसमा येलुड डियमा सुमला कोन्छ्योककी खोला डोसु लाडसुड। ५तमा खो पत्रुसकी चाला छ्यासुड। ती ज्युक्ला खोकी लोमा मिरा च्यिङ्डीतिवी चाला छ्यासुड। ६तमा ती ज्युक्ला खो थेङ्मा च्यिकला राड तेपा कितुप मी सयी ड सिनाड मङ्मुकी चाला छ्यासुड। तिवी पर्ला ललाइ ति शिसुड, यिने माङ्शोक ति तन्दा सेक साड सेन्बु वे। ७येलुड ती ज्युक्ला खो याकूब ताड खोकी लोमातिवा तेरीकी चाला साड छ्यासुड।

८तमा तेरी सिनाड ज्युक्ला खो डे चाला साड छ्यासुड। ड ति ल माछेनी क्येवु आडा दोके यिन। ९ड ति लोमा छ्येतिवी पर्ला छासे छ्युडा यिन। ड ति लोमा छ्ये वुड छ्योवु साड मे, च्यिलासिसिन कोन्छ्योकला तेपा कितुप खोकी चर्चकी मीतिवाला डे कशेन छेटाड बिन्दुप यिन। १०यिन्सिनाड ड तन्दा दुकै च्युङ्गुप

ति कोन्छ्योककी कटिन नेसुर राड च्युङ्गुप यिन। खोकी डला नङ्गुप कटिन ति तेर्मेला मागल। डे याड यम्बा लोमा छ्येतिवा सिनाड मड टेमु क्यायिन। ती ति डे राड क्यावु मिन, यिने डे मुला वोतुप कोन्छ्योककी कटिन नेमा क्यावु यिन। ११तुक क्यानी डे ख्याप्टाक क्यावु यिन्सिनाड यम्बा लोमा छ्येतिवी ख्याप्टाक क्यावु यिन्सिनाड ती सुड ति डियरा ख्याप्टाक क्यावु यिन। तमा ती सुड ति ख्यिरा तेपा क्यानी सेमला ज्याक्नी वे।

शेप ने डोसु लङ्गुप कोर्ला

१२ख्रीष्ट टुङ्नी डोसु लावु यिन सिनी डियरा ख्याप्टाक क्यासिनाड ख्यिरा पर्ला मी ललाइकी चुक क्यानी “शेप ने सेन्बु लङ्गुप मेङ्गिगी।” सिनी सि थुक्किवी? १३दोजो शेपतिवा सेन्बु मलाङ्गुप यिन्सिन काड ख्रीष्ट साड टुङ्नी डोसु मालावु यिन रो? १४दोजो ख्रीष्ट टुङ्नी डोसु मालावु यिन्सिन, दाक्पी लेन ल्यामु ख्याप्टाक क्यावु सुड ताड ख्यिरा तेपा क्यावु ति तेर्मेला डिवी। १५तमा ती सिनाड मड दाक्पु कोन्छ्योककी थोक्ला पङ्बु मेटेङ्बु तेरुप डिवी। च्यिलासिसिन कोन्छ्योककी ख्रीष्टला शेप ने डोसु लाडसुड सिनी दाक्पी पङ्बु बिन्दुप यिन। यिने वुतुड के शेपतिवा सेन्बु मालङ्गुप यिन्सिन खोकी ख्रीष्टला टुङ्गुप ने डोसु मोलोङ्गुपजा।

१६ दोजो शेषतिवा सेन्बु मालावु यिन्सियाड कोन्छ्योककी ख्रीष्टला साड डोसु मालङ्गुप यिन्जा। १७ दोजो ख्रीष्ट टुङ्नी डोसु मालावु यिन्सियाड ख्यिरा तेपा क्यावु ति तेमें डिवी। तमा ख्यिराड तरोड साड दिक्पी ओडला राड वोतुप ति यिन्जा। १८ तुकै यिन्सिन ख्रीष्टला तेपा क्यानी गोमाला शेषतिवा साड तेरी ना गलुप यिन्जा। १९ दोजो दाक्पी ख्रीष्टला रेवा क्यावु ति दी जम्बुलिङला देतुप पेला तिराड यिन सिंसिन दाक्पु ति तेरी मी यम्बातिवा सिनाड मड दुडलला ख्येलुप्जा।

२० यिन्सिनाड वुतुड के ख्रीष्ट टुङ्नी डोसु लावु यिन, तमा खो शेषतिवी नाड ने थल्माला सेन्बु लङ्गुप तप्की मी यम्बातिवाला साड शेष ने सेन्बु लङ्गिगी सिरुप पङ्बु छ्या तेन्सुड। २१ मी मिरा च्यिककी दिक्पाकी जोसालेन्सिन तेरी मीतिवा शि गोसुड। तुक राड क्यानी मी मिरा च्यिक शेष ने डोसु लावु तप्की मीतिवा तेरी शेष ने सेन्बु लङ्गिगी। २२ तीकी तेन्दोक ति तेरी मीतिवा आदमकी गिपा यिन्दुप तप्की शि गोसुड। तुक राड क्यानी ख्रीष्टला तेपा क्यावु तप्की मीतिवा तेरी शेष ने सेन्बु लङ्गिगी। २३ यिने सेन्बु लङ्गुप पेला रिम्बा क्यानी सेन्बु लङ्गिगी। तेरी सिनाड गोमाला ख्रीष्ट टुङ्गुप ने डोसु लावु यिन। तमा खो फेवु तुजेला खोला तेपा

कितुपतिवा तेरी शेष ने सेन्बु लङ्गिगी। २४ तमा जम्बुलिङ ना डोप तिङ्मी तुजे वुङ्गिगी, ती तुजेला ख्रीष्टकी तेरी डेकी ओङ्ज्येन ताड जम्बुलिङकी ओङ्ज्येन ताड डारतिवा ना तङ्नी दी जम्बुलिङकी तेरी ओङ्ज्येनतिवा पपा कोन्छ्योकला चेक तेकिवी। २५ च्यिलासिसिन ख्रीष्टकी डतिवा तेरीला फम च्यिनी तिवाला ख्रीष्टकी शापकी वोक्ला मालेपा सेक कोन्छ्योककी दी जम्बुलिङला ग्येला क्या नङ्गिगी। २६ तेरी सिनाड ज्युक्ला खोकी ना तोङ्गुप ड ति शेष यिन। २७ च्यिलासिसिन कोन्छ्योककी सुडला “तेरी जम्बुलिङ ति खोकी ओडला ज्याड वे।” सिनी टि वे। “तेरी ओङ्ज्येन खोकी ओडला ज्याड वे।” सिक्यावु ति कोन्छ्योक साड खोकी ओडला राड ख्येलिगी सिनी सिक्यावु ति मिन, यिने खोकी तेरी ओङ्ज्येन ति ख्रीष्टकी ओडला ज्याड वे सिनी सिक्यावु यिन। * २८ तेरी ओङ्ज्येनतिवा ख्रीष्टकी ओडला ख्येलिसिमा तिराड ख्रीष्ट खुरुड ति खोला तेरी ओङ्ज्येन नङ्गुप पपा कोन्छ्योककी ओडला दिक्पी। तुक क्यानी कोन्छ्योक ति जम्बुलिङ तेरीला ग्येला क्या नङ्गुप चोछ्येवु कोन्छ्योक यिन।

२९ दोजो शेषतिवा सेन्बु मलङ्गुप यिन्सिन शेषतिवी थोक्ला बप्तिस्मा

लावु ति काड तेन्दोक च्युङ्सुड रो? दोजो वुतुड के शेषतिवा सेन्बु मलङ्गुप यिन्सिन च्यिला तिवी थोकला बप्तिस्मा बिन्दुप यिन? ३०तमा ड्यिराड ति च्यिला ड्यी ताड नुप्ज्या दुक्पा खुर्किवी रो? ३१अच्युनुपतिवा, ख्यिरा येशू ख्रीष्टला तेपा क्यावु तप्की ड वुतुड के तेके क्यानी सिरिन, ड ड्यिमी टेड शेयिन। ३२दोजो डे एफिससला नाठुड वुडगी सेम्ज्येन दोके वोतुप मीतिवी मुला थमु ग्यप्सिनाड डला काड ख्येप्साड वे रो? दोजो शेषतिवा सेन्बु मलाङ्गुप यिन्सियाड “दाक्पु साप ताड थुङ्गुप कितुप्जा, च्यिलासिसिन दाक्पु याड सला शिवी।” सिनी सि थुप्किवी। ३३तुका जिनोक जोप मीतिवी ताम्डेला ख्यिराड माख्येल। “दाल्जा मेलोवातिवी दला शुसिन ख्यिरा किताड नालु साड मेलोवा डितो।” ३४च्याङ्से देता! तफेन्ला ख्यिराड दिक्पा कितुप क्युर। च्यिलासिसिन मिरा चोला याड कोन्छ्योककी कोर्ला छ्या राड मे। दी ताम्डे ति डे ख्यिराडला डोछा लोङ्गुपला सिक्पावु यिन।

शेप ने सेन्बु लावु जुकी कोर्ला

३५यिने मी ललाइकी “शेषतिवा चुक क्यानी सेन्बु लङ्गिगी? तिवी जु ति चुकै च्युङ्गिगी?” सिनी टि साड थुप्किवी। ३६ओ हाक्मोकोवुतिवा, काड ख्यिरा सेन तप्सिमा ती सेन ति

माशिवा क्यानी दोङ्बु क्येवी रो? ३७दोजो ख्यिरा ट यिन्सिनाड याङ्ना यम्बा काड यिन्सिनाड देपुप पेला सेन देप्किवी, यिने चुशिड राड मेदेपी। ३८तमा कोन्छ्योककी ख्यिरा तपुप सेन तीला खोरे नोवाला वोतुप दोके जो नङ्गिगी। तमा खोकी नम्बा तेरीकी सेनतिवाला दाक दाक्पुला पेवु चुशिड जो नङ्गिगी। ३९ती चुशिडतिवा दोके क्यानी तेरीकी जु ति च्यिक्पा राड मेवी। मी जु ति कुतुक गिवी, सेम्ज्येनकी जु ति कुतुक गिवी, तमा च्यच्युमतिवी जु ति कुतुक गिवी, ड्यातिवी जु ति कुतुक गिवी। ४०तमा जु साड देवाच्येनकी जु ताड जम्बुलिडकी जु गिवी। देवाच्येनकी जुकी ति वोसिर कुतुक वे, जम्बुलिडकी जुकी ति वोसिर कुतुक वे। ४१ड्यिमी वोसिर ति नम्बा कुतुक गिवी, उलाकी वोसिर ति नम्बा कुतुक गिवी, तमा कर्मातिवी वोसिर ति नम्बा कुतुक राड गिवी। तमा कर्मा च्यिककी वोसिर ति यम्बा कर्मातिवी ति सिनाड कुतुक गिवी।

४२शेषतिवा सेन्बु लङ्गुप साड तुकै राड यिन। मुक्तुम ग्यकुप पेला रुरुपला मुक्तुम ग्यकिवी, यिने सेन्बु लङ्गुप पेला नाम्साड मुरुलुपला सेन्बु लङ्गिगी। ४३तमा मुक्तुम ग्यकुप पेला दाक्पी जु ति ताङ्देन मेतुप ताड डार मेतुप डिवी, यिने सेन्बु लङ्गुप पेला मोवा वोतुप ताड डार छ्येवु च्युङ्गिगी। ४४तमा मी जु ति मुक्तुम ग्यकुप पेला जम्बुलिडकी जुला

मुक्तुम ग्यकिवी, यिने सेन्बु लङ्गुप पेला कोन्छ्योककी थु चाङ्माकी नङ्गुप जुला सेन्बु लङ्गिगवी। तुक क्यानी जम्बुलिङकी जु वोतुप दोके कोन्छ्योककी थु चाङ्माकी नङ्गुप जु साङ वे।

४५ ती तप्की कोन्छ्योककी सुडला “थल्माकी मी आदम ति सेन्बु वोतुप मी च्युङ्सुड।”* सिनी टि वे, यिने तिङ्मी आदम यिन्दुप ख्रीष्ट ति मिजी नङ्गुप थु च्युङ्सुड। ४६ थल्लाला वावु जु ति थु नेमा वावु जु मिन, तसाम पेलाकी दोके जु यिन। तमा ती ज्युक्ला वावु जु ति कोन्छ्योककी थु चाङ्मा नेमा वावु जु यिन। ४७ थल्माकी मी आदम ति जम्बुलिङकी थला नेसुर जोवु यिन। तमा ती ज्युक्ला वावु मी येशू ख्रीष्ट ति देवाच्येन नेमा वावु यिन। ४८ आदमकी गिपा नेमा वावु मीतिवी जु ति आदम दोके राङ डिवी। येशू ख्रीष्टला तेपा क्यानी देवाच्येनला डोप मीतिवी जु ति येशू ख्रीष्ट दोके राङ डिवी। ४९ तुक क्यानी दाक्पु ति थला नेसुर जोवु मी आदमकी जुजमला वे। ज्युक्ला ति दाक्पु देवाच्येनकी मी यिन्दुप येशू ख्रीष्टकी जुजमला मिजी सम्बा च्युङ्गिगवी।

५० अच्युनुपतिवा, ड ख्यिराडला दी ताम्डे ति सिरिन। श ताङ ठकला वोतुप दाक्पी जु ति कोन्छ्योककी ग्येल्खापला डो मुथुपी। तमा शिनी रुल

डोप जु तीकी नाम्साड मिशिवु मिजी ड्ये मुथुपी। ५१ ड्येना, ड ख्यिराडला छ्याकला वोतुप ताम्डे यी सिरिन। दाक्पु तेरी मिशिवी, यिने तेरी सिनाड तिङ्माला सङ्दुङकी वोरु तेन्लुङ्मे कोन्छ्योककी दाक्पी जु ति तेरी फो ज्यिकितो। ५२ ती पेला शेपतिवा येलुड नाम्साड मिशिवु च्युङ्नी सेन्बु लङ्गितो। तमा कोन्छ्योककी दाक्पी जु साङ फो ज्यिकितो। ५३ च्यिलासिसिन कोन्छ्योककी ना डोप जुतिवाला ति ना डो मिज्यिवी, शिनी डोपतिवाला ति मिशिवु मिजीला फो ज्यिकिवी। ५४ तुक क्यानी ना डोपतिवा नाम्साड ना मोडोवु ताङ शिनी डोपतिवा नरीकी थोक्ला लुवु पेला कोन्छ्योककी सुडला दुक सिनी टि वोतुप ति तेरी छेकिवी,

“चोवो कोन्छ्योककी नरीकी थोक्ला शेपकी खला ग्येल वे।”*

५५ “त याङ शेपकी सुला ग्येला कि थुक्किवी रो?

शेपकी ना तोङ्गुप ओङ ति कनी गाल?”*

५६ शेपकी ना तोङ्गुप ओङ ति दिक्पा यिन। तमा दिक्पाकी ओङ ति मोशाकी बिन्दुप ठिम यिन। ५७ यिने कोन्छ्योकला थुचिछे बुलिन, खोकी दाक्पुला चोवो येशू ख्रीष्ट नेसुर शेप

ताड दिक्पाकी खला ग्येलुप ओड नङ्गिवावी।

५८ तुक क्यानी डे ड्रियङ्ज्येवु अच्युनुपतिवा, ख्यिराड हम क्या देता। सी साड ख्यिराडला येर मर कितुप मोजोशिता। ख्यिराड ति चोवो येशूकी थोक्ला शब्ज्यी कितुला नरी फरिन ग्युका। च्यिलासिसिन ख्यिराडला छ्या वे, ख्यिरा चोवोकी थोक्ला टेमु क्यावु ति नाम्साड तेर्मेला मोडोवी।

यरूशलेमकी तेपा कितुप मीतिवी थोक्ला बुल्वा

१६ त कोन्छ्योकला तेपा कितुप यरूशलेमकी मीतिवी थोक्ला बुल्वा तेरुप कोर्ला गलातियाला वोतुप चर्चतिवाकी मीतिवाला डे क बिन्दुप दोके ख्यिराड साड किसा। २ नरी दिन्जा च्यिककी ड्रियमा थल्माला ख्यिराड तेरीकी दाक दाक्पी शम्बुप टङ्गा नेमा टङ्गा चे चेयी दुम्नी ज्योका। तुक क्यासिन ड वासिमा के बुल्वा दु मोगोशिता। ३ तमा ड वासिमा ख्यिरा दुम्नी ज्यकुप बुल्वा ति कल्नी ख्यिरा समला गलुप मी मिरा च्यिकला यिकी ताड मुला यरूशलेमला तोङ्गुपुनो। ४ दोजो ती पेला डो गोवु यिन्सिन ड साड तिवी मुला राड यरूशलेमला डोयिनो।

पावलकी खोरो थोक्ला गोड्बा शुवु

५९ ड माकेडोनियाला गल्नी ते नेसुर ख्यिराडला ठेतुपला वुङ्गुपुनो। ६० ख्यिरा ते वासिमा चेयी पर सेक देतिनो। च्युडिसन गुन्बी ल ति ख्यिरा मुला राड देतुप नो वे। ती ज्युक्ला ति ड कनी गल्सिनाड ख्यिरा डला दाल्जा कि थुष्किवी। ७ दी पाला ड ख्यिरा ते उकुर च्यिक तिराड ठेतुपला वुङ्गुपुप मिन, यिने कोन्छ्योककी नोवाला वोसिन ख्यिरा मुला चेयी पर सेक देतुप नो वे। ८ यिने पेन्तिकोसकी तुछ्येन^१ सेक ति ड एफिससला राड देतिनो, ९ च्यिलासिसिन डे थोक्ला छासे खक्छ्येवु लाका कितुपला गो ग्येर्पु पेनी वे, यिने डे तेन्दोकला लङ्गुपतिवा साड बडी वे।

१० दोजो तिमोथी ख्यिरा ते वासिन ख्यिरा ते देतुप पर सेक ति तीला ख्यिरा मुला राड जोल्हमु क्यानी दे च्यिता। च्यिलासिसिन ती साड ड दोके कोन्छ्योककी थोक्ला लाका कितुप मी यिन। ११ तुक क्यानी सी साड तीला ड्रियङ्मर माकिता। तीला लोदिमो क्यानी डे ते वुङ्गुपला दाल्जा क्यानी तोड। तेपा कितुप अच्युनुपतिवी मुला तिमोथी गिवी सिनी ड लाम लहानी गु देनी वोतो।

१६:८ पेन्तिकोसकी कोर्ला हाक्कोवुला दी थेपकी ग्यपला वोतुप “काले वोतुप छिकतिवा”ला ल्हाप।

१२ दाकपी नुप अपोल्लोसला तेपा कितुप यम्बा अच्युनुपतिवी मुला राड टिनी ख्यिरा ते ग्युक सिनी डे बडी सिक्वायिन, यिने ती तन्दा सेक साड ख्यिरा ते डो माथुप वे। ज्युकला च्युडिसन ख्यिरा ते डिते यिन्दे।

पावलकी बिन्दुप तिङ्मी टोङ्गु

१३ ख्यिराड च्याङ्से देता, तमा तेपा रम्बु क्यानी डाडेड ताड डार छ्येवु क्यानी देता। १४ ख्यिराड काड कि सिनाड सेमला ड्यिङ्ज्ये क्यानी किसा।

१५ अच्युनुपतिवा, अखैयाला तेरी सिनाड गोमाला कोन्छ्योकला तेपा क्यावु स्तिफनासकी खाङ्बी मीतिवा तेरीला याड ख्यिरा डो शेकिवी। तिवी कोन्छ्योकला तेपा कितुप मीतिवाला छासे क्यानी दाल्जा किटे क्यासुड। १६ ख्यिराड तुका टेमु कितुप मीतिवा ताड तिवी मुला राड शब्ज्यी कितुप मी तेरीकी ओडला दे सिनी ड ख्यिराडला ठाकुरे सिरिन।

१७ स्तिफनास ताड फोर्टुनाटस ताड अखाइकस डे ते वासिमा ड छासे गा क्यायी। च्यिलासिसिन ख्यिराड

मेसिनाड तिवी ड्यिराडला लोदिमु जोसुड। १८ तमा तिवी ख्यिरा सेमला डाडेड जोवु दोके डे सेमला साड छासे डाडेड ड्येसुड। तुक क्यानी तुका मीतिवाला ख्यिरा ताङ्देन किसा।

१९ एशियाला वोतुप चर्चतिवाकी मीतिवी साड ख्यिराडला टसी देलेक सिनी ताङ्नी वोतो। तमा अकिलास ताड प्रिस्काले ताड तिवी खाङ्बाला वोतुप कोन्छ्योकला तेपा कितुपतिवा तेरीकी साड ख्यिराडला टसी देलेक सिनी ताङ्नी वोतो। २० दे वोतुप तेरी तेपा कितुप अच्युनुपतिवी साड ख्यिराडला टसी देलेक सिनी ताङ्नी वोतो। ख्यिराड च्यिककी च्यिकला ड्यिङ्ज्ये ताड मुला टसी देलेक सिसा।

२१ दी टसी देलेक सिक्वावु ति ड पावलकी लाकपी राड टिवु यिनो।

२२ सी चोवो येशूला ड्यिङ्ज्ये मिकिवे, तिवा मोताप सुकुप यिनो। ओ ड्यिरा चोवो येशू, ड्यिरा पर्ला फेप!

२३ चोवो येशूकी कटिन ति ख्यिरा मुला लुशी।

२४ स्त्रीष्ट येशू नेमा ख्यिराड तेरीला ड ड्यिङ्ज्ये कितिन। आमिन।

